

閩中撫聞

地 310

930

帝 21

中國書店標價籤

編	號	本 數	定 價
		1	50

晉水陳孫鵬輯

關中瘧聞

發兌

本衙藏版
翻刻必究

序

昔蘇穎濱求天之奇聞壯觀
以知天地之廣大一方見可詢
不足助雄思而資博采也茲
具教不知昔人恥之閩中少明

序一

水秀自危宋以來榜閣神序
流傳道南玉季

朝而文物炳蔚載皆海者尤不獲
收肯嘗撫為一冊紀績讀誌
名人采軼事正偽傳事亦一類

例不極悉擷華於前人不敢妄
為傳云緣以錄為片板乃刪
之以就約旨晒卷帙無多何
異鴻龜但閱書志彙具有
全書廣覽者請言端溪

卷二

之水而為瀚海之視時
乾隆丁未季春晉水陳雲程
題于翊霄書屋



閩中撫聞卷一

閩晉江陳雲程孫鵬輯

福州府

閩越王騶姓夏少康封其庶子無餘于會稽以奉禹祀二十餘世至勾踐為越王又六世無疆為楚所敗越以此散諸族子爭立或為王或為公濱于江南海上王蓋其後也諸侯叛秦無諸與搖率越歸番君吳芮從諸侯擊秦後復佐漢滅項高帝五年立無諸為越王王閩中故地都東冶惠帝三年立搖為東海王都東甌世號東甌王

閩中撫聞

福州府

鱣溪在鼓山之北閩越王郢第三郎射中大鱣鱣躍出以尾纏三郎人馬俱溺土人為立廟號白馬三郎李忠定綱詩千年鱣骨專車在百丈龍湫瀑布垂

漢董奉候官人少得道交州刺史杜燮死三日奉以丸藥活之治病不受人物但令種杏一株山居種至七萬株虎為之守又嘗驅符斬白豎之妖

晉郭璞遷州記有銘云泰康之載遷卜甌基四色牢城層巒三運洪濟南流瑞龍西應其主螺女對現花峰千載不雜世代興隆諸邦萬古繁盛仁風其城形狀如龍如鳳勢氣盤拏遇兵不掠

邊荒不饑逢災不染六甲子滿廢而復用。

福州城中有九山。諺云：三山藏，三山現，三山不可見。九仙烏石。越王其現者也。羅山、冶山、閩山，其藏者也。又有隱隱磅礴於閩閩間者。曰靈曰芝曰鍾，故云不可見也。

永福高蓋山爲道書第七福地。初徐登牧牛山，椒遇二人奕遺徐一棋子，叱令歸，遂精手談。因得修煉訣。趙炳不遠千里訪之，徐喜酌酒當共飲。時正值霜月，草木凋敝，徐噴餘瀝，頃刻林花遍開。今所居名花林庄。及將仙去，埋棋子田中，涌土成堆，植牛杖。其旁旋生枝葉，丹成之日，與兄翁姊妹七人餌之，同時上昇。故

閩中撫開

福州府

二

其地有七仙亭及徐趙二真君祠。

高蓋山爲徐真君上昇處。數百年下湖僧搆小師來，主寺偕至。徐君壇得二石室，東室明潔，有水簾垂空而下，山下佳致可坐而挹。西則晻霭亦乏奇觀，獨去洞數武，有龜與石棋枰對立。相傳云：龜處室中，徐君叱而出之。其事頗誕。一日東室主僧赴邑齋會，小師乘其遠出，趨師床坐逝。主僧卽知之，嘆曰：巨耐小鬼奪我山中住處，亦卽齋席坐逝。其徒乃茶毗囊骨，歸塑像西室。雖加丹粉作喜色，每風雨卽脫落如怒。或者二僧禪寂雖高，而貪嗔一念未能了然者。

晉永嘉時中州板蕩衣冠入閩者八族林陳黃鄭詹邱何胡是也
以中原多事無復北嚮故六朝間仕宦名蹟鮮有聞者王氏據
有全閩雖不知書一時浮光士族與之俱南其後折節下士開
四門學以育才為急凡唐宋士大夫避地而南者皆厚禮延納
作招賢院以館之閩之風聲與上國爭列

唐宗室李成公椅大歷中領觀察使親帥諸生歌詩習禮考課文
行第其甲乙貢之宗伯由是閩人皆以不學為恥卒之日號泣
載道太常議諡以興教勸學德洽荒服奏諡曰成獨孤及為碑
文書立之

閩中撫聞

福州府

李陽冰般若臺篆書二十四字與處州新驛記縉雲縣城隍記鹿
水忘歸臺世稱四絕臺在烏石山

榴花洞在東山唐代宗永泰中樵者藍超遇白鹿逐之渡溪入石
門內初極窄忽豁然有雞犬人家主者曰吾避秦人也留卿可
乎超曰俟回與親屬訣當再來因與榴花一枝而出旦日復往
遂失所在

唐宣宗遊黃蘗山

福清縣南

與黃蘗禪師觀瀑布聯句云千巖萬壑不

辭勞遠看方知出處高溪澗豈能留得住終歸大海作波濤

黃巢為吳越錢鏐所逐遂從江右趨閩犯浚寧鎮邵武陳巖率鄉

勇擊却之。僖宗賜鼓角號九龍軍。巢南下福州。節度使鄭鑑不能禦。巖助師一鼓平之。鑑表爲泉州刺史。嗣又表以自代。鎮閩九載。大著威惠。撫納王潮兄弟焉。墓在福州太平里。歲久湮沒。康熙閒。土人掘地得一石。乃黃璞所撰墓志也。郡人林侗見之。移置郡學藏經閣下。後李範爲修葺樹碑。構山亭以祀。唐僖宗入蜀。群盜蜂起。壽春王緒剽行。全攻陷固始。聞州人王潮及弟審邽、審知俱材勇。招之後南下漳泉。以道阻糧少。令軍中無得以老弱自隨。犯者斬。潮兄弟扶母以從。緒切責之曰：「吾聞軍行有法。無不法之軍。」潮對曰：「人皆有母。不聞有無母之人。」緒

閩中撫聞

福州府

四

怒欲斬之。諸將爲請。有望氣者謂軍中當有暴興之人。緒潛視諸將。有勇略及魁岸者。因事殺之。衆懼行全擒緒。緒自殺。遂請潮爲主。潮辭乃除劔。刺地祝曰：「拜而劔三動者奉以爲主。」至其翁審知。拜劔躍於地。衆以爲神。羅拜之。審知讓潮而自爲輔。遂有其地。福建觀察陳巖表爲刺史。

王審知字信通。常乘白馬。軍中望之披靡。號白馬三郎。有過失。潮猶加以箠楚。審知無愠色。及潮疾。命權節度使以讓審邽。不許。始潮未入閩。閩人謠曰：「潮水來巖頭。沒潮水去。矢口出巖。陳巖也。矢口審知也。審知謙約下士。士多依之。梁亡。或勸其建國。審

知曰寧為開門節度使不作開門天子卒諡忠懿

唐莊宗遇弒王延翰審知子取史記閩越王無諸傳示其將吏曰閩

自古王國也不王何待遂自稱大閩國王猶稟唐正朔至延鈞

審邦次子信道士陳守元之言築寶皇宮受冊即皇帝位國號

閩改元龍啓追諡審知為昭武孝皇帝廟號太祖立五廟置百

官以福州為長樂府

王審知有婢陳金鳳鑄嬖之遂立為后作九龍帳以居之初鑄嬖

吏歸守明以色見倖號歸郎後鑄得風疾金鳳與歸郎通百工

院使李可殷者又因歸郎以進國人歌曰誰謂九龍帳惟貯一

閩中撫閩

福州府

五

歸郎鑄婢李春燕有色其子繼鵬烝之鑄病繼鵬因金鳳以求

春燕鑄快快與之明范汭作閩宮詞二首云露華如水燕官牆

紅豆花兼荔子香多少娥眉閒待月九龍帳底貯歸郎四條絃

上按新聲半是仙皇手教成舊事內人誰敢洩春來燕子不呼

名

黃華田任福州西湖詩云樂遊散後霸圖空漁唱菱歌起晚風大

夢山頭一輪月夜深曾浸水晶宮按閩主王延鈞城西造水晶

宮與其后陳金鳳承蓮湖中后製樂遊曲宮女倚聲和之曲云

龍舟搖曳東復東采蓮湖上紅更紅波淡淡水溶溶奴隔荷花

路不遠。西湖南湖鬪綠舟。青蒲紫蓼滿中洲。波渺瀾。水悠悠。真
表君王萬歲遊。

閩主繼鵬。元妃梁國夫人李氏。同平章事敏之女。繼鵬寵春燕欲
廢。夫人葉翹上書極諫。繼鵬批其疏後曰。春色曾看紫陌頭。亂
紅飛盡不禁秋。人情自厭芳華歇。一葉隨風下御溝。放翹歸永
泰中梁國竟廢。

忠懿王郡主梳妝樓。在郡北胭脂山。陳金鳳李春燕死皆葬焉。葉
毅庵觀國詩云。粉黛珠奩褪曉妝。他時香塚枕前岡。胭脂山下
胭脂井。留與後人弔夕陽。

閩中撫閩

福州府

六

王氏甃城日陶者悉以錢文印其上。後吳越錢忠獻王遣兵伐閩。
盡取其地。人以為先兆云。

錢氏有閩地。命卽王審知故宅立廟祀之。門外有于兢所書德政
碑。宋刺史錢昱重新其廟。復立碑以紀。并塑故都押衙孟威等
十六人配享。歷代迎春日。郡守遣祭。取其碑下土為春牛。曹能
始學佺迎春詩有馬從太守分驂去。牛向前王乞土來之句。

忠懿王墓在蓮花峰。明宣德初。屯軍盜發。王塚得玉帶。玻璃碗。及
王畫像。葉毅庵詩云。玉魚金盃出空山。弓鼻修髯識異顏。不是
英靈銷歇盡。欲傳真像向人間。

審知語
忠懿

赫嶺有漆林書堂爲唐翁承贊承祐及猶子襲明肆業之所天祐時承贊以右拾遺奉詔冊王審知爲瑯琊王賜金紫以行途易其鄉名里號曰文秀光賢書錦梁開平四年復爲閩州禮副使黃滔贈詩曰衣錦還鄉翻作客迴車謁帝却爲歸後依王審知特蒙優崇尋爲相子鑑載希愈宋時皆登仕籍從子乾度官左補闕有子六人相繼登進士時稱六桂

唐泰初中承福令王君秩滿飛舟太原邑人留餞夜深未至其室人題詩云何事潘郎戀別筵歡情不斷妾心懸太原山下相思處猿叫青山月滿船宋政和中邑令陳武祐刻其詩於巖上今

閩中撫閩

福州府

七

已磨滅惟太原二字存

梁開平初閩主迎神晏主鼓山嘗誦經靈源洞水聲喧轟叱之水逆流東澗因名喝水巖石刻甚多惟宋徐錫之詩最清拔詩云重巒複嶺鎖松關只欠泉聲入座閒我若當年侍師側不教喝水過他山

郭璞遷城記云左旗右鼓全閩二絕旗山在洪塘江之西山巔敬側其形如旗有仙人石勺漏洞諸勝明鄭善夫鐫旗山第一峰大字其上鼓山屹立海濱延袤數十里而遙山巔有石如鼓故名有大頂峯亦名峯前峰朱子書天風海濤鐫之石又有小頂峯浴

鳳池喝水巖諸勝

眼中滄海小。衣上白雲多。明林世壁題鼓山句也。徐惟和燭讀之。有詩云。閒尋老衲叩禪堂。墨跡淋漓滿上方。一自題詩人去後。白雲滄海兩茫茫。

雪峰無字碑古頌云。一片如屏紫翠間。風吹日炙蘚花斑。莫言箇裡無文字。要在高人着眼看。山舊名象骨。唐乾符中閩越王閩山僧義存云。象骨何奇。對曰。山頂暑月猶有積雪。故名雪峰。

雪峰蘸月池旁有古杉。乃閩王審知與義存手植。皆數十圍。義存植者直而參天。閩王植者移而逮地。水磨磨下絕。雀初義存題云。菴前永日無復子。磨下終年絕雀兒。至今信然。

閩中撫聞

福州府

八

侯官陽崎山唐子野隱處也。子野年十三從父行賈杭州。父池適令守舍。王伾微時覆舟於羅刹江。子野見之呼漁人曰。能生人者予百金。於是漁人競援伾子野。即出舍中百金予之。父歸大異之子野曰。身得義名而令父喪羸非孝也。乃去爲人僕。賃其主人微聞救伾事。義之倍其賃。直乃爲小賈。久之致富。以其半上其父。以其半散給貧交兄弟。折節讀書。治左氏春秋。後伾爲散騎常侍。使人召之。亡去。伾命福建觀察使物色之。得子野於陽崎江上。伾令隨之。至深山家。徒四壁。儿上周易一卷而已。乃

爲佯喜狀設脫粟食與使者約曰旦日雪霽當會於傳舍及旦不至使者馳至其家書幣封識如故而子野已行矣

道山薛老峰薛老薛逢也咸通中爲候官令與僧靈觀遊創亭其側書其峰曰薛老云按逢有元日田家詩南邨晴雪北邨梅樹裏茆簷晚更開蠻榼出門兒婦去烏飛迎路女郎來想闍中詩也

搜神記云閩人謝端得大螺如斗蓄之每歸盤飧必具端疑而伺之見一姝麗甚詰之曰我天漢白水素女上帝哀卿少孤遣妾具君膳今去留殼與卿端用以貯糧其米常滿資給數代因名

閩中撫闈

福州府

九

江爲螺女江

唐末周朴避亂入閩居安溪永安里後居福州烏石山黃巢陷城欲用之朴曰吾向不臣天子肯從賊乎巢怒殺之頸湧白膏數尺後人祀之烏石山

雙峰寺有三賢堂祀李瓚僧懶安周朴宋紹興初張浚謫福州將遊雙峰夢一僧與一金紫人一白袍秀士來謁翌日登山堂見三人像如夢中所見心異之後浚帥閩乃疏於朝建廟賜號剛應郡人鄭昂爲記其略曰東漢之衰陳蕃李固孔融之徒相與標榜以節義名世故雖以曹操之險賊終身睥睨不敢取漢室

唐末名節掃地。宋溫以斗筭穿窬之才談笑而攘神器。士大夫亦欣然從之。莫敢正議。使公得志。其肯以國與人乎。

蔡伯倫字景蕃

福清人

四歲應神童科試。誦真宗御製歌詩。即日授

秘書正字。真宗賜詩曰。七閩山水多才俊。三歲奇童應盛時。家世應傳清白訓。嬰兒自得老成姿。初當移步來朝謁。方及能言便誦詩。更勵孜孜圖進益。青雲千里看前期。蓋伯倫名爲四歲齒未三週。尋赴東宮侍仁宗讀。元符初以司農卿致仕。年八十七矣。凡食祿八十一年。

宋治平中張伯玉守福州。編戶植榕。熙寧以來綠陰滿城。暑不張

閩中撫聞

福州府

十

蓋程師孟詩云。三樓相望枕城隅。臨去猶栽木萬株。試問國人來往處。不知曾憶使君無。

烏石山唐勅改閩山。宋郡守程師孟以登覽之勝可比道家蓬萊。方丈瀛洲。改爲道山。建亭其上。曾鞏爲記。劉克莊詩云。絕頂烟開霽色新。萬家臺觀密如鱗。城中楚楚銀袍子。能讀曾碑有幾人。

歐冶池在冶山麓。閩越王鑄劍處。唐元和間置劍池院。風雨時波濤晦冥。僧惟鑿得銅刀劍環數枚。送武庫。宋程師孟作亭當其治。龜澗有在竹林中者。後漸湮塞。僅方塘半畝矣。

越王石在福州城南望北臺下劉宋遺愿傳云石在海濱嘗隱
霧間惟清廉太守乃得見愿往就觀清徹無所蔽

閩中道學開自龜山其先三山有陳季慈烈陳古靈養周公闢希

孟鄭宏中穆稱海濱四先生

陳古靈養爲浦城主簿有偷兒莫知主名陳曰某廟鐘能辨盜犯
者捫之當有符乃墜塗以墨帷蔽之命羣盜往捫中一人畏鐘
有聲不敢觸視其手無墨遂伏罪

鄭俠少隨父官江寧讀書清涼寺閉戶苦學時王安石以舍人居
憂聞而奇之使其徒楊驥往依俠學雪寒俠讀書過夜半拉驥

閩中撫聞

福州府

十一

起登閣望雪酣賦浩然他日驥爲安石誦之安石嘆賞其漏隨
書卷盡春逐酒瓶開之句

治平間天久不雨鄭俠見饑民困苦狀因繪圖以進請罷王安石
新法詣閣門不納乃假稱密旨發馬遞上之銀臺司神宗覽之
長吁數四夜寢不寐翌日蠲放十八事下詔求言越三日大雨
執政入賀乃知出自俠也

鄭俠以擅發馬遞編管汀州改其州及放歸所存惟一拂號一拂
居士宣和元年忽夢鐵冠道士遺之詩視之乃子瞻也嘆曰吾
將逝矣作詩云似此生平只藉天勝如過鳥在雲烟如今身畔

無餘物贏得虛堂一枕眠卒年七十九嘉定中諡曰介

進士張翥入都適蔡京求師其族子薦之翥再四辭不獲遂即館京未及接談一日謂其子弟曰汝曹曾學走乎皆駭曰嘗聞先生教子弟讀書徐行未聞以走翥曰天下被而翁破壞至此旦夕亂且作賊必先至而家惟善走可免耳諸子弟大驚急告京曰先生病心京瞿然曰此非汝所知卽見翥問計翥示之引者德羅忠義京叩所知遂以楊龜山薦擢用之

胡澹庵

銓

以乞斬秦檜竄新州獨王廷珪以詩送之流夜郎又有

太常寺丞陳剛中

字彥

以啓賀之云屈膝議和知廟堂禦侮之

閩中撫問

福州府

十二

無策張膽論事喜樞庭經遠之有人又云誰能屈大丈夫之志寧忍爲小朝廷之謀知無不言願請尙方之劔不遇故去聊乘下澤之車亦貶安遠廷珪晚年孝宗召用壽踰九十寺丞竟死安遠無嗣幸不幸之不同如此

紹興間黃公度榜第三人陳修福州人解試四海想中興之美賦云葱嶺金堤不日復廣輪之士泰山玉牒何時清封禪之塵親書此聯黏之殿壁及唱第問之知其未娶也詔出官人施氏嫁之時修年七十三矣時人戲語曰新人若問郎年幾五十年前

二十三

永福瑞雲峰有古識云天寶石移狀元來期龍爪花紅狀元西東
宋乾道開嵯石夜墜既而石松上復生龍爪花是年蕭國梁社
天下鄭僑黃定繼之蕭居狝峯鄭管龜嶺黃居龍嶼當時詩云
狝峯龜嶺與龍嶼三處山川壯矣哉相去其間只百里七年三
度狀元來

狝峯蕭國梁登科是歲第一人本丞相忠定趙公故事設科以待
草茅士凡預屬籍掛仕版者法當遴選唱名日遂陞蕭爲榜首
其謝啓云預飛龍之選淮南論次以當先無汗馬之勞鄭侯何
功而居上蓋用宗室及蕭氏事人多稱之

閩中撫聞

福州府

十三

慶元中臺臣李沐希韓侂胄意劾丞相趙汝愚逐之太學生楊宏
中與徐範張道林仲麟蔣傳周瑞朝皆閩人上疏侂胄大怒編管
五百里禁錮十餘年人稱爲六君子及韓誅始進用

趙汝愚死貶所太學生敖陶孫哭之以詩揭通衢壁上云左手旋
乾右轉坤云何群小肆流言狼胡無地容姬且魚腹終天葬屈
原一死固知公不免孤忠賴有史長存九原若遇韓忠獻休說
渠家末代孫墨跡未乾壁已爲人昇去韓侂胄大怒遣捕陶孫
以變姓名得免

晉書題虞公庵詩云虞寄庵前薛徑通滿山臺殿出青空難逢堆

案文書少偶見荒欄笑語同梅粉巧含溪上雪柳黃微破日邊
風從今準擬頻行樂日伴尊前白髮翁按虞寄避侯景之亂居
此

張宏圖上書言慈懿皇太后攢陵在湖曲修吉寺湖上遊宴非怵
惕凄愴之意寧宗感悟鑿御鷁沈之自是西湖絕清蹕之聲宋
人詩云龍舟大半沒西湖此是先皇節儉圖二十餘年安靜裡
掉歌一半在康衢蓋實錄也

劉氏諸賢祠祀宋名儒彝康夫藻砥礪五先生也後乃增祀嘉譽
世南及价碑文謂彝從胡安定學康夫從周希孟學藻從羅豫

閩中撫聞

福州府

十四

章學嘉譽從李延平學世南從林拙齋學砥礪從朱晦翁學砥
子价從黃勉齋學皆賢人也世豈有盛於此哉

越遷山有晦翁巖奇峭幽絕逶迤數百武有石對峙如削爲石門
宋乾道中劉砥劉礪築精舍於此晦翁避僞學禁來此二劉師
事之公大書讀書處三字鐫於石門之上

南渡後詩人尤蕭范陸稱西大家楊誠齋云近世詩人若范石湖
之清新尤梁溪之平澹陸放翁之敷腴蕭千巖之工致皆余所
畏也前閩清人名德操字東夫所居屏山千巖競秀因號千巖
老人

連江鄭所南字億翁宋亡改名思肖示不忘趙意工畫蘭更祚後皆畫露根者人問之曰土被人奪去汝不知耶題畫云純是君子絕無小人深山之中以天爲春僑居吳下坐臥不北向扁其室曰本穴世界蓋以本字之十置下文則大宋也惡趙孟頫之受元聘遂與絕交疾革囑其友唐東嶼曰思肖死矣頫爲書大宋不忠不孝鄭思肖語訖而絕意蓋指不能死國與不娶無後也著有鐵函經藏蘇州承天寺井中至明崇禎庚辰始出人異之

游汝官於閩遂家福州元初徵之不仕頫所居曰遺民浮宅衣一

閩中撫聞

福州府

十五

布袍寒暑不脫書其背曰遺民布袍常登道山汲泉刈草吟咏爲樂

林清避元不仕隱姓名匿居山寺會府公編冊山寺見清詰問且曰能爲詩乎答曰頗能卽以編號八音命次之清應聲曰金紫何曾一掛懷石田茅屋自天開絲竿釣月江頭住竹杖挑雲踏上來匏實曉收栽藥圃土花春長讀書臺葺除一點浮雲慮未筆題詩酒數杯府公驚羨遂與爲友一日忽談海濱人物曰如林清者雄才碩德惜未見其人清不覺有感府公曰公殆是耶清曰若林君君安得見之相與盡醉明日訪之不知所往

元至正間浦江吳清翁渭有月泉吟社預於丙戌小春月望命題
至正月望叔卷聘謝臯羽為考官三月三日揭曉選中二百八
十名首名羅公福賞羅一縑七丈筆五帖墨五笏餘遞差詩以
春日田園雜興為題詩云老我無心出市朝東風林壑自逍遙
一犁好雨秧初種幾道寒泉藥旋澆牧犢曉登雲外隴聽鶯新
立柳邊橋池塘見說生春草已許吟魂入夢招公福本姓連名
文鳳閩人

宋時福州有文繡局織繡供御男女雜作無別元閩海道知事范
梈作閩州歌述其弊廉訪使去罷之葉毅庵詩云鸞鵲蒲桃入

閩中撫聞

福州府

十六

漢官海郭杼柚易愁空清歌採後國綳散好把新絲繡范公

元末吳海與王翰共誓不事二姓翰屏跡永福山中明太祖欲致
之令有司敦請就道海聞之即白衣冠往弔未至舍得翰書與
訣曰昔在潮陽我欲死不嗣如綫我無子彼時我死作忠臣覆
宗絕祀良可恥今年辟書新書新到月屋下三人存寸刃在手
顧不惜一死了却君親恩海語其使曰歸語歸言吾來殯爾矣
入門而翰已自刎

閩中十才子生於明初福清林子羽鴻有鳴盛集長樂陳景明亮

有滄洲集長樂高彥恢廷禮有嘯臺木天清氣二集閩縣王安

中恭有白雲樵唱鳳臺清嘯草澤狂歌三集閩縣唐亨仲恭有
善鳴集閩縣鄭孟宣定有澹齋集永福王孟敷傳有虛舟集閩
縣王中美褒有養靜齋集閩縣周微之元有宜秋集侯官黃元
之元有鳴秋集萬歷中三山袁景從表馮用昭榮選輯為十才
子詩集○閩書載十才子則有陳郊陳仲完高稜唐震而無陳
亮高廷禮周元黃元

徐子與云唐亨仲少與同郡黃濟為詩友濟亦不列十子間則閩
詩不啻十子也乃後又有三君集郎中鄭君繼之善夫主事郭
君子長萬程及布衣傅君木虛汝舟然鄭郭以進士著傳視景

閩中撫聞

福州府

十七

明為難彼時游揚者眾也○木虛與弟木剡汝楫亦稱二傑

有明選輯閩詩者閩縣鄧汝高原岳撰閩詩正聲懷安陳仲聲元

珂撰三山詩選閩縣徐惟和燧撰晉安風雅徐興公勳榕陰新

檢中恆引晉安逸雅其全書不可見

林鴻登釣龍臺詩逐鹿屠龍事渺茫空臺依舊祧山岡衣冠神禹
傳苗裔屈壤宗周列職方南粵雲來螺渚白東甌天接海門蒼
登臨送別兼懷古不惜狂吟倒玉觴臺為越王餘善釣白龍處
亦名越王臺有達觀亭碧光亭諸勝

狀元馬鐸少時夢中有語之者曰雨打無聲鼓子花不省所謂後

與同郡林誌同舉進士誌高才鄉會皆第一殿試忽夢馬踏其首以是怏怏爭於上前上曰朕有一對對佳者狀元也曰風吹不響鈴兒草馬郎以夢語對而林思竭不能於是得賜狀元
閩小紀云永樂壬辰狀元馬鐸戊戌狀元李騏俱長樂人耳談謂馬母後適李復生騏予屬長樂令呂素嚴詢其邑中前輩俱云無之兩家後人亦云世俗謬傳絕無影響且當時亦無增馬為騏之事乃知耳談多不經如此

武宗時僉憲林文纘赴京抵潞河適上巡幸突入纘舟時一嫒抱纘六歲兒在船中上問曰此何人纘曰臣子上抱置膝上曰相

閩中撫聞

福州府

好當與朕為子又指婢曰仍令此女抱攜之時護蹕人至踰跟促去兒入宮日夜啼不止文纘入都與素識大璫謀欲出兒璫乘機奏曰此兒誠薄福不如舍之且收留乞養祖宗有禁上曰林某浼汝作說客耶如再啼當棄之水璫懼與纘謀覓善泅者伏河側兒啼不止上果棄之河泅者扯兒入水中俟上回急出之兒僵矣久之始甦文纘攜之赴嶺南任又休致杜門教子二十一歲舉於鄉又四年成進士名璧世宗出武宗朝宮人前婢亦在列婢至福州會館問有林紳否璧適在寓道其詳抱哭攜歸婢茹素奉佛終其天年

許天錫出使安南王以金爲贖辭以詩曰菁茅又喜與也貢菁以
何須滿載歸因爲之建郤金亭比歸劉瑾疑其多金不知其不
受餽也天錫盤查內庫條逆瑾罪上之瑾矯旨逮問時天錫候
命宿西華門外朝房瑾夜遣人殺之血流滿面鄉人爲之斂
宏治間鄭繼之築少谷草堂于金鰲峰著少谷山人集十卷官禮
部祠祭司武皇南狩與曹郎黃澤等跪闕泣諫廷杖嘉靖初起
官刑部郎中詩專學杜好遊名山黃河水云繼之才力沈鬱去
杜爲近豈知其心事亦如杜之每飯不忘君○繼之與李空同
何大復等稱十才子

閩中撫聞

福州府

十九

張襄愍經與楊忠愍繼盛同日決論者謂自東南用兵以來襄愍

嘉興之捷第一自嚴嵩柄國以來忠愍劾嵩之疏第一同時而
死天下憐之按襄愍禦倭大戰於王江涇斬首一千八百級有
奇功得罪嚴黨趙文華死焉

連江陳第字季立以諸生爲遊擊將軍守薊鎮者十年明史與俞

大猷繼光同傳著毛詩古音考讀詩拙言屈宋音義以求古

之本音 國朝東吳顧氏寧人浙西毛氏稚黃關中李氏天生

安溪李氏厚庵講明古音實自季立發之

申屠姑名夷光長樂人適侯官儒士某貧甚姑作賦以勵其學巨

好方六郎陷夫於死旋求娶焉姑給以厚葬故夫卽如命比葬
佯許歸方見六郎於尸內以刃刺之有進視者連斃四五人持
六郎頭奔墓所祭夫畢自刎

萬歷己丑謝在杭

肇淵

與徐惟和

題

下第過六和塔愛其幽靜各

賦一詩欲題壁間而寺僧號呼奈何浪跡吾壁吾且取水滌之
在杭笑不復題越三載在杭拜吳興司李行部至杭則寺僧懼
罪逸去久矣在杭大笑復題云雙旌五馬遶江城驚起山僧合
掌迎三載重來渾似夢終軍原是棄繻生

謝在杭送練中丞遺裔歸家詩并序云金川門之變練公子寧以

閩中撫聞

福州府

二十

御史大夫抗節死闕下闔門荼毒獨有侍媵抱匝歲于匿民間
得免展轉入閩爲人傭保六世孫綺者爲新寧陳孝廉所立掌
書記萬歷戊戌孝廉計偕入浙有江右楊生應祥同舟先一夕
生夢練生持刺謁己心異之比入孝廉船見書記侍側雅暫不
羣指問何姓答曰姓練生心動叩之曰得非吾里練中丞之後
乎綺不應涕泣滿面生益驚駭窮詰之具得其狀亟以百金爲
購孝廉不受遣綺綺不肯行曰以死殉國人臣之行且九族赤
矣歸將何爲生益賢之歸家具白於官當事者以幣來聘授以
衣巾俾奉公祠官爲置田廬百畝聞者莫不嘆息泣下以爲天

道有知云燕山日黑黃塵起金川門外鼓聲死長樂宮爲瓦礫
場殿庭血流成海水御史大夫練子寧手持三尺干雷霆覆巢
自分無完那一門百口歸冥冥事去人亡三百載蘆荻蕭蕭餘
故壘長陵松柏已千圍孤臣遺後今安在釣龍臺下舟可楫新
寧城東山巖嶭灌園誰能識法章傭肆猶堪藏李燮一日天迴
地轉時千金購出練家兒若敖之鬼終不餒行路聞之皆歎欷
我登鍾靈山遙望石頭城寧爲孝孺死莫作陳瑛生爲君慷慨
終一曲悲風颯颯江波綠

金壇段敏以進士出爲福建僉事自題其廳事云眼前皆赤子頭

閩中撫聞

福州府

十一

上有青天其慈祥正直之意皆在言表

指揮使胡上琛過易水賦懷古詩云一死酌知己丈夫非所難至
今過易水遺恨誤燕丹明亡與妾劉氏易服北面再拜作詩有
孝旣存宗忠惟盡職欲求死所於斯爲得數語其妾亦題壁云
嚴粧朝大士大士亦低眉死忠君得所殉節妾安辭時上琛年
三十七妾甫二十並端坐飲藥卒

康熙閒瀋陽范忠貞

承謨

總督福康

狀逆脅之不屈被拘絕食十

日求死不得三年蓬首垢面經歷百折著蒙谷自序百苦吟以
見志耿逆遣其黨殺之燬骨荒郊秦寧許鼎時爲騎卒夜行亂

石宿莽中携骸藏於家明年走數千里達京師以聞

御賜忠貞炳日扁額

御製碑文祠於道山以同難慕容嵇永仁王龍光沈天成及弟承譜陪

祀

張撫軍伯行 鰲峰書院記其略云不佞欲與士之賢而秀者講明

濂洛關閩之學以羽翼經傳既表章其遺書使行于世廼捐俸

購屋于九仙山之麓葺而新之為鰲峰書院前建正誼堂中祀

周程張朱五夫子後為藏書樓置經史子集若干櫥其東則園

亭池樹花卉竹木之勝計書舍一百二十間明窓淨几幽闥宏

閩中撫聞

福州府

廿二

做士之來學者日給廩餼歲供衣服無耳目紛營之累而有朋

友講習之樂藏焉修焉息焉游焉無不可為學也

汪薇號棣園歙縣人 督學閩中自題楹帖於文場曰爾無文字當安

命我有兒孫要讀書賞拔精當哀刻試文曰應繩錄錄板數易

為舉業正鵠護先賢壠完貧士婚燬坊刻淫詞構棘闌號舍時

謂張興文學常哀後一人而已秩滿肖像於道山卒之日郡人

士聚而哭之

呂東萊先生泊城詩云路逢十客九青衿半是同袍舊弟兄最憶

市橋燈火靜巷南巷北讀書聲可想閩中人文之盛

張遠字超然康熙己卯鄉薦第一初嘗挾策遊四方未有所遇登
滕王閣題詩云高閣登臨此大觀四山對面壓龍盤豈無詞賦
驚閩帥已把文章讓子安人世百年風浩浩長江千古水漫漫
南州高士今誰是有客斜陽獨倚欄一達官爲之延譽詩名家
振

黃莘田任官粵中新會令從大僚讌集分賦塵詩觸忌劾其詩酒
廢事詩云趁風高颺逐風低每傍車輪撲馬蹄避汝可堪頻障
面辟伊何處覓靈犀濛濛最愛迷當道滾滾終教躋作泥惟有
潔身歸去好斷無半點到幽栖莘田有硯癖自號十硯居士歸

閩中撫聞

福州府

廿三

里壓裝惟端坑石及詩草而已年八十時重宴鹿鳴

杭董浦

世駿

云建寧別駕沈君豔稱閩人謂戶戶皆花家家是玉

筆床硯匣恆在香臺寫韻傳經乃其粉碓青襟夫壻接手傳箋
紅履侍兒扶輪赴社扇林下之清風鮮桑中之失德如斯風氣
頗可鋪張

三山閩秀張季琬字宛玉能詩工繪事自題蛟蝶圖云遠濛飛出
宋東家春去何心夢落花描得滕王新粉本小窓只當寫南華
臺山之麓有龍江書院其南有巖曰盤谷舊傳有二人裹糧入山
憇草屋下忽一人自外至袖中出芋數枚撥落葉煨以相啖遲

明遂失其處但見木葉盈尺題詩其上云偶與雲水會不與雲
水通雲散水流後杳然天地空下有度仙橋爲黃天谷訪徐尊
二子處

方廣巖下有石室可庇千人五代時建寺內供賓頭盧尊者元王
翰鐫飛珮二字於石天門林泉生有聯云石室雲開見大地山
河三千世界水簾風捲露半天樓閣十二闌干名人題詠甚多
鐵佛殿下有古井爲閩時爲藏經院括銅億萬劬鑄辟支佛高數
丈御史黃滔有記明會異撰榜其楹曰古佛由來皆鐵漢凡夫
但說是金身

閩中撫聞

福州府

廿四

簾山多梅有梅花塢夾道植梅萬株可十里許顏曰羅浮春色明
徐惟和詩有十里花爲市千家玉作林之句每逢冬日騎馬看
花尋香曳雪道相屬也

壽山多美石其品以田坑爲上水坑次之山坑又次之色以田黃
爲第一今田坑旣盡石皆出芙蓉巖查慎行詩所云今之存大
洞蓋已少別穿巖穴開芙蓉居人業此成石戶斑白老叟攜兒
童是也

芙蓉山別麓有洞曰靈洞洞口可丈許紆迴十餘里遊人篝燈束
炬以入乍廣乍隘紺乳時滴陰氣逼人火色青閃內有五代曾

幾存所闢開山堂石床石鼓石盆猶存過此莫窮其源矣
胡曾仕鑑登平遠臺詩云平遠臺前日欲曠東來形勝望中分玉
蟬近綴鰲峰石一粟遙連馬竄雲王會自來通禹貢朝圖猶憶
抗秦軍仙山羽化今何處城上千年一度開臺在九仙山山有
鰲頂峰石刻狀元陳誠之讀書處

長衣亭在閩縣東內湯院有溫泉宋嘉祐間郡守元絳闔郡圖得
其名乃濬其源礮石爲井環之以屋

舊城僧寺最多慶歷中通計千六百二十五所宋徐經孫福州卽
景詩云潮田種稻重收穀道路逢人半是僧城裡三山千簇寺

閩中撫問

福州府

廿五

夜間七塔萬枝燈得其概矣

三山元夕燈火最盛遊人士女車馬喧闐至二十外薄暮市上兒
童連臂相呼謂之求饒燈婦女從數橋上過謂之轉三橋宋方
孝能詩云燈外風搖沾酒帘月中人數買花錢少年心事如飛
絮半逐遺香拾墜鈿

荔支盛稱閩廣然百粵風土記云荔支色青大如楊梅肉薄核大
味甘而不酸如閩龍眼之下者許子遜在廣州時咏荔云丹荔
年年玉盃新鏡中得黛半合顰可憐嶺外紅鸚鵡猶說華清病
商人則廣州之種比閩爲劣矣

蠟房生海中石上四面漸長每房有肉大者如馬蹄小者如人指面潮來則諸房皆閉有小蟲入則和之以充腹間有巖巖如山者亦名蠟山閩小紀以閩中海錯比之畫家謂西施舌當列神品蠟房能品江瑤柱逸品

閩中多種番薯通志謂萬歷間閩人得之外國瘠土沙礫之地皆可以種其莖葉蔓生如山蕘蹲鴟之類味極甘有紅白二種生食熟食或晒為乾或磨為粉皆宜亦可釀為酒邇來栽種尤盛閩地糗糧半資於此

琉球在福州之東浮海入貢駐南臺柔遠驛 康熙甲子莆田林

閩中撫聞

福州府

廿六

舍人麟焜奉使 冊封著竹枝詞一卷錄數首云手持龍節渡滄溟璀璨

宸章護百靈清比胡威臣所切觀風先到邵金亭徐福當年採藥餘傳聞島上子孫居每逢卉服蘭闈問欲乞羸秦未火書三十六峰瀛海環怒潮日夜響潺湲樓西一抹青林裡露出烟蘿馬齒山王居山第兔園開松檉櫻花倚石栽多少從官思授簡不知若個是鄒枚奉神門內列鷓行乞把

天書續 大荒喚取金騰開

舊詔休僞感泣說

「先皇望仙樓閣倚崔巍日看青山十二回笙鶴綵雲飛咫尺不教弱水
隔蓬萊詳見池北偶談

閩志昉於東晉太守陶夔唐三山林譔林世程各有閩中記皆久
湮無存淳熙間清源梁克家守福州輯三山志時永嘉陳傅良
舉通判州事負文名多所考述元致和又有三山續志明時通
志有三獨莆陽黃仲昭所撰與晉江何喬遠閩書並稱詳核
國朝則鄭官詹開極修之謝閣學道承復卽鄭本輯之 乾隆
丁亥間沈編修廷芳復有續志卽今之前後二志也

閩晉江陳雲程孫鵬輯

興化府

漢景帝時豫章何翁媪張氏生九男四女九男目俱盲惟長者一
目何翁與淮南王遊九子勸父偕隱不聽乃相率入閩初居福
州之于山已而遊莆謁胡道人飲以井泉九人之目盡開乃結
楓爲亭居其中復東踰嶺入九鯉湖湖底怪石羅列石各有穴
穴皆兩竅紆曲通達乃煉丹於湖上丹成以食鯉鯉皆變爲朱
有兩翅昂首噴沫招風雨湖水爲溢九人各乘其一上昇後人

閩中樵間

興化府

祠九人於湖上中坐翁媪前九仙其側有范侯者相傳翁有四
婿曰張曰楊曰范曰信或曰范乃邑人九仙始至時范知其非
常日左右之一日竊啖其丹目驚黑欲死九仙憐之解以白雞
血乃甦後人欲知禍福者先薦白雞於范侯陳其所請宿於祠
後所得夢無不奇驗

莆至陳尙未知學鄭露與其弟莊淑從永泰徙莆據南山之勝構
書堂以修儒業莆人化之遂爲開莆來學世稱南湖三先生
莆陽林披字茂則官睦州刺史子九人葦藻甚薦華蘊蒙邁詵亦
皆官刺史號九牧林家

林藻省試珠還合浦賦成假寐皆有告之者曰何不叙珠去來
寤而增之曰珠之去今山無色兮氛霧冥冥海無光兮空水浩
浩珠之來今川有媚兮祥風習習地有潤兮生物振振果中第
及謝主司杜黃裳曰叙珠去來若有神助

林蘊爲西川節度使韋臯推官臯卒劉闢代之有反謀蘊曉以順
逆不聽欲殺之惜其才命行刑者以刀磨其頸脅之蘊叱曰死
則死耳我頸豈頑奴礪石耶闢知不可屈釋之

貞元壬申福唐尉林攢丁大夫人喪躬開坎室自挺輓篋與兄弟
手攻肩負以鑿以築三月初忽祥光照耀香氣氤氳所栽松柏

閩中撫間

興化府

二

遍垂甘露日出後轉堅而明鄉人取嘗之甘味異常歐陽詹作
甘露述事聞于朝詔立雙闕以旌之

江梅妃九歲能誦二南父奇之名曰采蘋開元中選爲妃性喜梅
明皇號爲梅妃善屬文有蕭蘭梅花綺窓諸賦會太真入侍忌
之遷居上陽宮後明皇憶妃夜遣小黃門召至西閣叙舊愛繼
而太真至歸宮作樓東賦以寓意太真聞之以妃怨望訴上上
默然他日封真珠一斛密賜妃妃不受以詩付使者曰桂葉雙
眉久不描殘妝和淚污紅綃長門自是無梳洗何必明珠慰寂
寥明皇覽詩惻然命樂府度爲新聲號一斛珠及安祿山犯關

如守節死葬池東梅樹旁明皇歸感夢發視大慟以如禮葬
製文誄之

朱司訓仕玠過江如故里詩云山磬水漲渚添痕傳說江如舊住
邨青塚魂歸同寄恨莆陽端不讓荆門玉環豐臆洵無倫窈窕
樓東更絕塵翻笑上皇誠錯計馬嵬亡國竟何人獨闢西望六
龍奔罪命溫泉識刃痕懔懔史官編外戚不書名姓懋貞魂悵
望華清渥澤頻閉拈玉管倍傷神古來嬪御誰相匹長信宮中
奉侍人

乾寧元年禮部試止戈爲武賦徐昭夢黃一燭立就有破山加點

閩中撫聞

興化府

三

擬成無人之句侍郎李擇覽而奇之登進士第四昭宗聞渤海
人得賞賦家家珍寶之詔賜狀元

徐夤號能賦謁朱全忠誤犯其諱全忠色變夤狼狽走出未及門
全忠呼知客將責以不先告斬於界石南夤欲遁去恐不得脫
乃作過太原賦以獻其略曰千金漢將感精魄以神交一眼沙
陀望英風而膽落全忠大喜遺絹五百疋全忠自言夢見淮陰
侯使授兵法一眼沙陀蓋指李克用也

徐先輩夤唐季擢第不肯仕朱梁歸死于莆其墓只書唐先輩與
朱文公書晉處士陶潛何異先輩晚年有歸來延壽溪頭坐終

日無人問一聲之句今釣磯草堂基猶存

莆中吳塘曰相傳唐末有吳公者棄官隱此故山川村落皆以吳名元時有人淘井得石有詩字隱隱可辨詩云去國投茲土編茅隱舊踪年年秋水獨對數株松字大徑寸筆力遒勁末小書乾寧三年秋吳餘數字漫滅不可識

天后林氏唐九牧諱蘊九世女孫歷傳至諱保吉爲後周統軍兵馬使歸隱於莆之湄洲嶼后之六世祖也考諱愿宋都巡檢母王氏后爲第六女生時有紫色祥光異香滿室有道者識爲神人長能乘雲渡海預知休咎曾於機上神遊拯親於溺年二十

閩中撫聞

興化府

四

八得道昇化實宋雍熙四年二月十九日也厥後神靈屢著如返風安流掘泉愈疫殄賊庇民之事不勝枚舉故歷贈封號國朝康熙二十二年我師克澎湖有神兵導引及屯天妃灣靖海將軍施公琅謁廟見神衣半體猶濕澗有泉僅供百口時甲士萬餘方患渴忽湧醴泉挹之不竭施公表上其事勅建祠於湄洲更封天后道志又云莆田林氏婦人將赴田者以其兒置廟中曰姑好看兒去終日不啼不飢不出闕暮歸各攜去神蓋篤厚其宗人也

熙寧九年莆田薛奕武舉第也同里徐鐸亦冠文科神宗賜詩曰

一方文武魁天下萬里英雄入彀中

水蘭陂在木蘭山下會永春仙遊之水東注于海宋治平初有長樂錢氏女築陂不就投水死邑人祀之每風雨夕隱隱見雙燈自山過陂故老傳爲四娘巡陂云明鄭善夫詩云滄海未銷錢女恨路人惟誦李侯碑秋深極浦生寒水神至靈風滿素旗蓋謂此也李侯名宏熙寧八年應詔募修會有馮仙智日者授以規模乃捐家資七萬餘濬壘石創陂三十二間以時縱閉今陂上有李長者廟馮仙附焉

壺公山在莆田城南舊經云昔有隱者遇一老翁於絕頂見宮闕閩中撫聞

興化府

五

臺殿似非人間翁謂曰此壺中日月也因名朱文公過此指謂人曰莆中人物之盛乃此公作怪古識云水遠壺公山此時方好看壺公山欲斷莆陽朱紫半自蔡君謨興水利灌民田引水遠山自後登第視前爲多

熙寧橋舊爲白湖渡宋熙寧間始造舟爲梁鄭橋詩云千尋水面跨長橋隱隱晴虹臥海潮結駟直通黃石市連艘橫斷白湖腰是也靖康元年太守江常鞭石累基後守張讀續之修四十尋廣二十之一亦名通濟徐師仁爲記

宋慶歷中郡有榕一株三十七根附於一榦太守錢尙因繪爲圖

以示知福州王遠達遂以嘉木名之有詩云清陰隨日遠翠影
共烟浮避暑疑無夏當風別有秋

紹興八年廷對以黃公度爲狀元陳俊卿次之及謁御高宗問曰
卿士何奇輒生二卿黃對曰子魚紫菜荔支蠓房俊卿對曰地
瘦栽松柏家貧子讀書高宗曰公度不如卿遂賜俊卿第一
夾漈草堂在莆田廣業里宋鄭樵著書處樵少好讀書以討論著
述爲事李綱趙鼎張浚輩皆器重之紹興中召見先上修史大
例十二篇帝曰聞卿名久矣敷陳古學自成一家何相見之晚
耶不肯就仕閱四年書成上之以爲秘書院編修官

閩中撫聞

興化府

六

林艾軒光朝以道學倡莆詩亦爲莆之祖林亦之其高弟也艾軒
卒莆人推亦之嗣講席艾軒之學一本躬行亦之戶外履幾半
於師矣或勸其著書答之詩曰講學紅泉不著書只將心學授
生徒趙汝愚卽閩上其學業於朝命未下卒學者稱網山先生
詩亦有出藍之譽

劉後村克莊學於真西山初除潮倅遷建陽令嘗詠落梅有東君
謬掌花權柄却忌孤高不主張讒者箋其詩以示柄臣由此間
廢十載因有病後訪梅絕句云夢得因桃却左遷長源爲柳忤
當權幸然不識桃并柳也被梅花累十年後官至秘閣修撰

蔡元長京既南遷中路有旨取所寵姬慕容邢武者三以金人
指名來索也元長作詩以別云爲愛桃花三樹紅年年歲歲惹
春風如今去逐他人手誰復尊前念老翁初元長之竄也道中
市飲食之類問知蔡氏皆不肯售至於詬罵無所不至州縣吏
爲驅逐之稍息元長嘆曰京失人心一至於此至潭州作詞曰
八十一年佳世四千里外無家如今流落向天涯夢到瑤池闕
下玉殿五回命相形庭幾度宣麻只因貪戀此榮華便有如今
事也後數日卒門人呂川卜老醵金葬之

柯潛官翰林學士教習庶常受業者李賓之諸公也院後有二柏
閩中撫聞興化府
爲先生手植號學士柏造瀛洲亭以臨之劉文安爲院長堦井
於其旁柯亭劉井至今以爲美談

宋王詒及翁誥讀書福平山時有青衣童指堦前桂曰試問梅福
尋真隱耶爲東坡訪故居後詒誥並擢第詒尉古田山爲梅福
隱處誥令歸安屬惠州東坡謫居在焉其言皆驗又歐陽詹別
墅亦在山麓故其在蜀寄林蘊詩曰村步如延壽川原似福平
無人相與語獨自故鄉情自注延壽林之別墅福平予之別墅
也

陳忠肅文龍守興化日製生爲宋臣死爲宋鬼兩大旗植軍門每

巡城則持以前導計議官李拱首倡軍民迎順俘公併家人以見陵都陵都以母老子幼動之公曰宋無失德三官北狩二鄰深入瘴烟何必窮兵至此我家世愛國恩萬無降理母老且死先皇三子岐分南北我子何足動念陵都慨然改容又復陵都書曰生平讀書但識孟子效死勿去句左傳有死勿二句他非所知也公六館盛名魁天下不八年起登政府時事且急以御馬自隨每攬轡輒於邑泣下及被執死馬亦尋斃

陳忠肅初在太常累試不入格夢太學祀神岳侯請交代自謂必死於學既而廷對第一仕宦顯達不復記矣及守鄉郡又夢神

閩中撫聞

興化府

八

通語首言交代後署至正年月日心甚駭愕未幾宋亡被俘至杭拘於太學以前夢語故人趙有得因嘆曰社稷人民一旦易主此天數也皇宋未亡之前鬼神已奉其正朔矣吾今病且死而適囚太學得無爲太學神乎果卒墓在知果寺旁葬之日墓上生竹竹有刺人不能登世謂岳王爲公前身岳墳松不北枝公墓竹盡生刺忠魂結爲芥木如出一轍也

宋丞相陸公秀夫護蹕南渡至仙遊縣楓亭帝命娶蔡日忠之女爲妾婚於活水亭後其子釗却元聘隱此蔡女名荔娘聞崖山之變陸公驅妻子入海招魂以葬作詩詞哀之

活水亭陸氏譜載陸公二書錄之以補史闕其白同寅云日食晝
昏波翻浪浩上天如此震怒海猶不容何以圖復不肖實不忍
言所終矣心傷時棘哀切呼號用代面布一字一淚伏惟公鑒
秀夫頓首告侍從云身豈秀夫所私有哉天下之事之所寄也
今事既如此念國之有忠義猶天地之有元氣天地非元氣不
運國非忠義不立秀夫惟知忠義以立國而已閩關幹旋在乎
天地秀夫不以身為私有也秀夫謹白

官人斜在南山月峰右舊爲雨塌有樵豎入其穴竊蟾蜍釵鏡以
歸官人憑巫自述爲宋嬪隨官家航海歿此樵懼反寶器而掩

閩中撫聞

興化府

九

之林石來麟唱有詩云噪樹寒鴉日易昏內家斜對石龕門雲
鬢宮樣埋莎草薜荔山阿酌酒痕崖海不填精衛恨春心長托
杜鵑魂金絲銅局傷零落紅粉猶傳秘器存王阮亭謂入唐人
鼓吹集竟不可辨

元陳紹叔居浮邱山自製璿璣玉衡以測乾象其友寄之詩云夜
過浮邱月滿山一尊相對夜漫漫門臨大海風濤壯家有小天
星斗寒因號其室爲小天

林廷綱以郡弟子員入監明太祖親試擢吏部給事中嘗侍遊江
間殿太祖首唱云江間小殿與雲齊梁上新添燕上泥廷綱奏

可足成之曰雉扇曉開紅日近龍衣春濕彩雲低旌旗影裡
猶息斧鉞門前騏驥嘶簪筆詩成同拜舞太平天子賜新題又
承旨作春江漁父圖詩甚蒙寵眷及請歸省太祖親製勅諭賜
之宋濂爲跋

陳實登林環榜負才不相下疏取狀元不公成祖詰之對曰臣百
問百答遂令解縉撰百問策一道縉擬以七十二賢賢賢何德
雲臺二十八將將將何功及記里鼓論成祖臨軒環條答詳悉
而實詞義更覺斐然竟以廷爭違旨發戍其軍由曰廷爭狀元
正統間王常以御史言事左遷知莆田事政務嚴明嘗書聯署楹

閩中撫聞

興化府

十

云牧民猶帶舊風霜見者咸以爲佳妻黎氏通書史語常曰風
霜御史職也君今出牧奈何專尙嚴乎請易猶帶二字曰無事
常忻然改焉

戴大賓鄉會皆第一殿試第三授編修時劉瑾兄女有才姿養爲
己女欲室之爲飭邸舍具騶粟廝隸大賓乃縱酒伴狂瑾意稍
衰

柯希齋維騏自登第後卽疏病歸削迹公門二三同年若李太守
默吳太宰鵬徐閣老階並不通書丁卯聞科舉交薦有詩云落
落聞身老病餘乞歸實自肅皇初生來奈有雲林癖交絕曾無

政府書者述何功叨薦剡行藏只合老懸車木蘭孤艇烟波裡
免負馴鷗與狎魚

成化時命詞臣賦元夕烟火詩莆田黃仲昭以詞近俳優非儒臣
所宜與同官章懋莊景上疏忤旨廷杖皆坐謫一時京師有三
君子之稱先時修撰羅綸以論李賢奪情謫外又號翰林四諫
林潤爲少都御史開府蘇松始至諸大吏曰夫夫也始祭酒削藩
王成都御史餒故相礫侍郎與中書舍人者也感屏息不寧潤
則寬然長者惟延父老訪疾苦以上聞蓋潤初登第卽以別好
爲任嚴嵩及子世蕃沈坤馮懋卿羅龍文皆其所劾者也卒年

閩中撫閩

興化府

十一

僅四十

岳正知興化鑿小西湖賦詩有林泉青似滴城郭隱如無之句書
生林照戒石工留似字勿刻工以告公親詣問故林曰似與如
未免合掌更以欲字何如公撫掌大喜再拜謝之贈以束帛

莆中陳昂號白雲詩學少陵以布衣自晦漂流吳越織屨爲生死
後托夢鍾伯敬爲之傳陳給事科捷詩云白雲遙步浣花溪半
世漂流無定栖冷魄猶爲詩傳計不勝哀怨是無題

莆庠生昌言死妻陳彩玉經理喪具畢從容辭姑及媵婦作絕命
詩飲藥死詩曰結髮爲君婦十年琴瑟調秋風隨蝶化誓與子

同州針刺易書卷冀君名業新君既中途殞何惜此一身絕粒
求速死衆口與我違姑媿苦相勸留我欲何爲俯仰惟長嘆捨
身死若生魂既與君俱心同蘭水清

荔支譜云興化軍風俗園池勝處惟種荔支當其熟時雖有他果
不復見省尤重陳紫富室大家歲或不嘗雖別品千計不爲滿
意陳氏欲採摘必先閉戶隔牆入錢度錢與之得者自以爲幸
不敢較其直之多少也

閩中撫聞卷三

閩晉江陳雲程孫鵬輯

泉州府

唐觀察常袞有文章高名好誘後進一見歐陽詹比爲芝英

貞元八年陸贄知貢舉取歐陽詹第二人一時韓愈李觀李絳崔羣王涯馮宿庾承宣皆登第稱龍虎榜故劉昌言詩云一舉首登龍虎榜十年身到鳳凰池

歐陽詹初發太原途中寄所思詩高城已不見况復城中人此古樂府體也黃璞乃有太原函髻之謗謂公悅一妓以此隕身好

閩中撫聞

泉州府

事者傳之

歐陽詹與莆中林藻林蘊善同肄業於莆之廣化寺靈巖精舍後卒京師歸櫬至莆遂葬其讀書處林衡士過歐墓有句云滿院蓬蒿數十尺先生苔骨化成石四門聲教風雨高山鬼啾啾來跳躑乾隆庚午爲林族佔沒得莆令王公文昭清出乃復其舊紳士賦詩頌之

許稷挾策入關遇舍人陳詡四門助教歐陽詹校書郎邵楚萇侍御林藻在京師閩川舉子釀酒食會諸先達詹以稷鄉人親故特與俱詡酣戲稷曰今日之會子何人斯輒冒其閒稷投杯憤

誹曰男兒患不能立志霄漢豈有局鏞王侯出處豈必常耶叨
此一殮穰之過矣噓酒而出入終南山讀書出就府薦遂擢第
晉江黃宗旦字叔才有神童稱其大父命題早春詩有就中喜有
龍門客躍出洪波只待雷之句咸平元年進士第二人與鄉人
李慶孫齊名人爲語曰國朝才子黃宗旦天下文章李慶孫
唐黃守恭自光州移居泉州樂善好施人稱長者垂拱間夢一僧
乞所居地爲寺唯之曰樹產白蓮乃可越二日桑樹果開蓮花
遂捨宅爲寺卽今之開元寺也

泉州開元寺初名蓮花寺亦名紫雲寺寺有二塔東塔號鎮國唐

閩中撫聞

泉州府

二

咸亨間僧文偁以木爲之宋易以石西塔梁貞明間王審知建
亦以木爲之號無量仁壽塔宋紹興間始爲石塔

會稽秦公緒系避天寶之亂居南安九日山山有大松百餘章爲
東晉時物公緒結廬其下穴石爲硯注老子彌年不出姜公輔
謫泉訪之與語窮日不能去乃築室依焉公輔卒公緒葬之山
下人爲立亭曰秦君亭號山爲高士峰 國朝姜西溟有謁姜
相墳詩云白楊已被行人折鷓鴣徒悲故相墳寒食空山頻灑
淚千年忠魄冷荒雲

韓偓流寓閩中號玉山樵人後卒於南安龍興寺有南安寓居詩

此地三年偶寓家，枳籬茆屋共桑麻。蝶矜翅暖徐窺草，蜂倚身輕浪著花。天近函關屯紫氣，水通吳甸浸晴霞。豈知卜肆嚴夫子，潛指星磯認海查。

韓偓捐館日，溫陵帥聞其家藏箱笥頗多，而鍼鏹甚固，發觀得燒殘龍鳳燭，金縷紅巾百餘條，蠟淚尚新，巾香猶鬱，乃偓爲學士時視草，金鑿宮人秉燭送歸者。

羅隱餘杭人，自號江東生，咸通中遊晉江，乞食於羅裳山下，山下人侮之，乃畫馬石上，每夜出食，人未追之，則見馬入石中山下，人禮焉，隱爲畫椿馬，不復出。

閩中摭聞

泉州府

三

王審邽之子延彬，襲其父封于泉，有詩曰：兩衙前後訟堂清，軟錦披袍擁鼻行。雨後綠苔侵履跡，春深紅杏鎖鶯聲。因攜久醞松醪酒，自煮新抽竹筴羹。也解爲詩也爲政，儂家何似謝宣城。人多誦之。

詹敦仁勸王氏入貢，王氏寵予以官，作辭命篇曰：爭帝圖王事，總非中原失統，可傷悲。往來賓客如郵傳，勝負干戈似局棋。周粟縱榮寧忍食，葛廬頻顧謾勞思。江山有待早歸去，好向鷓鴣林擇一枝。乃築清隱堂於清溪之佛耳山。

閩王氏亡國，留從効，繼領留後務，雖稱藩南唐，實雄據一隅。先是

妙應大師黃涅槃有識云先打南後打北留取清源作佛國後清源果有干戈之擾爲從効姓名之應

五代留從効于泉城重加版築旁植刺桐歲久繁密其木高大枝葉茂蔚初夏時開花鮮紅葉先萌芽而花後發則年穀豐登故丁晉公詩有我今到此憂民切只愛青青不愛紅之句又陳陶詩云芳鬢三珠植世間風光滿地赤城閒無因秉燭看奇樹長伴劉公醉玉山海曲春深滿郡霞越人多種刺桐花可憐虎竹西樓色錦帳三千阿母家

宋劉昌言極有才思下第作詩落句云唯有夜來蝴蝶夢翩翩飛

閩中撫聞

泉州府

四

入刺桐花後爲商州記室王禹偁贈詩云年來復有事堪嗟載筆商州髻欲華酒好未陪紅杏宴詩狂多憶刺桐花蓋爲是也嘉禾嶼在海中名鷺島廣袤五十餘里商賈雲集舁舶遠通上有鼓浪嶼雞鳴時登絕頂遙望海日如火輪 國朝倪隨庵詩云絕頂雞鳴觀日出懸崖霧散現蜂窠是也又有場老山唐處士陳黯讀書處臨海有黯釣魚磯北則龍溪尉薛沙居焉沙爲合之之後

自長溪徙此稱南陳北薛

吳真人名本同安人由貢舉授御史宋仁宗時醫帝后愈煉丹救世景祐間蛻化于漳州白礁乘鶴昇天後屢著靈異永樂中封

保生大帝

蘇緘知邕州交寇圍邕四十二日緘晝夜令士卒發神臂弓射賊所殪甚衆賊將引去或教以糞土傅城高數丈賊蜂擁而登城陷緘領傷卒厲戰至力不敵乃曰吾義不死賊手亟還泊殺其家三十六人藏於坎乃縱火自焚寇至求屍不獲神宗聞緘死爲之嗟悼至哺時方進膳歎曰可惜蘇緘近世忠義之士罕有其匹諡曰忠勇邕人祀之

魯公會公亮少客京師有客泣鄰舍甚悲問之曰負錢鬻女於商問其直曰四十萬公亮如數予之其人擇日送女則公亮已解

閩中撫聞

泉州府

五

纜三日矣天聖二年成進士

錢熙南安人嘗撰三酌酸文世稱精絕略曰渭水凝碧早拋釣月之流高嶺排青不逐眠雲之客又曰年年落第春風徒泣於遷鶯處處羈遊夜雨空悲於斷雁其卒也鄉人李慶孫哭之曰四彝妙賦無人誦三酌酸文舉世傳

李綸提舉廣東常平曰適兄縝出守恩平酌於江濱相勵以清白傳家綸慷慨言曰倘負斯言有如此水遂投杯於江時江水洶洶杯不沒者久之觀者無不驚歎民歌之曰石門之木清且清良吏一歎千古榮爭如李公投杯盟江流洶洶杯停停至今石

刻與吳隱之酌貪泉詩對峙

洛陽江界晉惠二邑唐宣宗微行至此嘆曰此開山水大似吾洛陽故名

蔡忠惠襄洛陽橋碑文云泉州萬安渡石橋始造於皇祐五年四月庚寅以嘉祐四年十二月辛未訖功累趾於淵醜水為四十七道梁空以行其長三千六百尺廣丈有五尺翌以扶欄如其長之數而兩之糜金錢一千四百萬求諸施者渡實支海去舟而徒易危而安民莫不利職其事盧錫王實許忠浮圖義波宗善等十有五人既成太守莆陽蔡襄為之合樂讌歌而落之明

閩中撫聞

泉州府

六

年秋蒙召還京道由是出因記所作勒於岸左

萬安橋記作碑二段今在忠惠祠中橋坦夷如官道可五里許兼以忠惠記文書筆並精千古於是好事者競傳橋異謂橋未興時深不可趾忠惠為檄使隸名夏投之海若而告之隸嘆息曰茫茫遠海何所投檄買酒劇醉臥小艇上起視則檄已換第書一醋字忠惠曰神示我矣當廿一日酉時潮退可趾也又二碑之石一粗一膩好事者復云外國人摹仿其書勒粗石上夜換載歸此二事要屬齊東而列朝卿傳又以移檄海神作蔡錫修橋事亦不知何據也

仁宗皇祐間蔡忠惠以便養知泉州架洛陽橋先時公爲闢道使
者夾道種松以蔽煇毒閩人卽橋旁作堂以祀之又作詩二章
俾歌以祀公一云道邊松大義渡至泉漳東問誰植之我蔡公
歲久廣蔭如雲濃甘棠蔽芾安可同委蛇天矯騰蒼龍行人六
月不知暑千古萬古長清風一云洛陽橋一望五里排瓊瑤行
人不知滄海潮衝之往來乘仙飈蔡公作成去還朝玉虹依舊
橫雲霄考之溱洧功何遙千古萬古無傾搖

蘇隨登嘉祐二年進士任博羅令棄官歸隱栖霞洞葆神鍊氣不
與俗接人稱紫雲先生一夕夢遊異境覺而賦詩曰夢乘鸞鳳

閩中撫聞

泉州府

七

到仙家侍女風流魏月華琥珀盞斟千歲酒琉璃屏種四時花
金函藏錄文刊玉石壁題名篆點砂一枕北窓初睡覺日移門
外柳陰斜後數年端坐而逝

韓國華守泉時生魏公

琦

於官舍治前榕樹悉開花如班枝都人

石刻國華及魏公像祀於府中命府治之堂曰忠獻後易以清
署至王梅溪

十册

守此乃仍其舊爲詩曰相出相州生此州

巍勲業宋伊周後人莫要輕更改更有堂名似此不又署有安
靜堂爲蔡忠惠所作嘗於此書荔支譜梅溪解官時有復安靜
堂舊額詩

泉州府治舊在雙門頂明太守常性移於東街後人以魏公誣
卽其地建生韓古廟以祀城隍俗人附會謂衙中榕樹生班枝
花侍婢連理取以奉國華國華幸之懷孕爲嫡夫人所逐乃生
魏公於廟世傳班枝記雜劇是也移署之事稀有知之者
晉江魏國夫人宋龍圖學士陳從易之女內翰蘇紳之妻而丞相
頌母也從易紳頌皆嘗守杭夫人三至杭邸題邸柱云吾少從
父至此中與吾夫偕今同吾兒凡三閱江山之勝蘇文忠輓詞
云雞鳴爲善日日新八十三年如一晨豈惟室家宜壽母實爲
朝廷生異人

閩中撫聞

泉州府

八

崔唐臣與蘇子容頌吳晉叔濬同學相好二公先後登第唐臣遂

罷舉業久不相問嘉祐中二公在館下一日忽見臙舟汴岸者
唐臣也亟就見之邀與歸不可翌日唐臣留刺再謁之則舟不
知所往矣歸視其刺刺之末有細字一絕云集仙仙客問生涯
買得漁舟度歲華案有黃庭樽有酒少風波處使爲家

呂惠卿與蘇子瞻相仇隙惠卿至貶所謝表云龍鱗鳳翼固絕意
於攀援燕雀鼠肝一冥心於造化子瞻於邸報見之笑曰吉甫
終會作文字

紹聖中呂惠卿復知延州途出西都時程伊川居里謂門人曰吾

聞呂吉甫未識其面明且西去必經吾門且一覘之迨旦了無所聞詢之則過去已久矣伊川歎曰從者數百人馬數千能使悄然無聲馭衆如此整肅在朝雖有可議而才調亦何可掩也

廬陵云謝景山詩頗多如自種黃花添野色旋移高竹聽秋聲園林換葉柳初熟池館無人燕學飛之類皆無愧唐賢景山名伯景天聖二年甲科爲許州法曹詩文雄健俊逸得自母夫人女弟希孟亦工詩廬陵稱其隱約深厚守禮而不自放有古幽閒淑女之風

閩中撫聞

泉州府

九

九月山房宋熙寧間郡守陳偁建其子瑩中讀書其中晦庵爲同安簿秩滿寓此

墨妙堂在奉仙院中林少卿以東壁有蔡忠惠詩因以墨妙名忠惠詩曰日照溪山生翠光春深花草雜幽香登臨誰識遲留意門外塵埃去路長末云青陽蔡襄慶曆四年二月二十日入延福寺登秦君亭觀白雲井訪北臺還書奉先東壁

王沂公曾聯捷三元末第時以梅花詩獻呂蒙正云而今未問和

夢事已向百花頭上開呂云此生已安排狀元宰相矣梁文靖克家梅花詩云九鼎燮調終有待百花羞滿敢言芳亦聞天下

位宰相二人皆晉江人王爲武肅王審封六世孫少隨父克官益都父卒貧不能歸因家焉後孫判賀州曠回居晉江

瑞蓮堂在泉州講堂之右宋紹興二十九年有蓮異萼同蒂生於梁克家讀書處次年克家廷對魁多士慶元四年生於學之槐亭會從龍復作第一人因改槐亭爲魁瑞亭解邦俊爲記

慶元戊午春會從龍時爲晉江教諭將應舉謁夢城中鐵爐廟神書幅紙示之云兩爵並耀於今秋一薦獨橫於天下旣寤筆之牖間越夕友人謝次山亦禱於廟夢神告之曰吾已語曾子明矣請視其牖謝亟謁會及秋二人果並領鄉薦明年會遂登進

閩中撫聞

泉州府

士第一

林外字豈塵詞翰瀟洒談論不羈飲酒無算在上座日獨游西湖寂處得小旗亭飲焉外美風姿角巾羽氅飄飄然神仙中人將去索筆題壁問曰藥爐丹竈舊生涯白雲深處是吾家江城戀酒不歸去老却碧桃無限花明日都下盛傳某家酒肆有神仙云後登紹興三十年進士

蔡持正

確

少於泗洲道中山寺讀書僧厭其久書舍有竹書一絕壁間云窓前翠竹雨三竿瀟洒風吹滿院寒常在眼前君莫厭化成龍去見應難已有宰相氣象

吳處厚武始諂事蔡確後以推治舒亶獄爲確所怒確既守安州處厚知漢陽兩人益交惡會漢陽吏至安州確問處厚近况吏誦其秋興詩云雲共去時天漠漠雁連來處水茫茫確笑曰猶亂道如此吏歸以告處厚怒曰我文章蔡確乃敢譏笑耶及得車蓋亭詩乃箋注上之謂其子柔嘉曰二十年深讐今報之矣其子問知其詳泣曰此非人所爲大人何以自立于世處厚悔悟遣步追之則文書已投矣

蔡持正謫新州侍兒琵琶從焉常蓄一鸚鵡甚慧丞相呼琵琶卽扣一響板鸚鵡傳呼之琵琶逝後誤觸響板鸚鵡猶傳言丞相

閩中撫聞

泉州府

十一

大慟感疾不起嘗爲詩曰鸚鵡言猶在琵琶事已非傷心瘴江水同渡不同歸

泉郡北倚清源

一名齊雲

南挹紫帽清源聳起三峰有洞天三十六宋

裴道人仙蛻之所爲蛻巖有乳泉清冽不竭山與州因此得名陟其巔視郡城若鯉狀昔人題巖頂曰烟火城中萬戶夕陽此處孤僧紫帽有十二峯常有紫雲覆其上洞曰金粟唐元德真人鄭文叔所居傳有羽士自洛陽寄書文叔文叔握粟犒之歸視乃精金也宋寧宗御書金粟之洞勒其上絕頂有凌霄

江東裴道人紹興中來泉頭戴通草花行歌於市曰好酒喫三杯

好花插一枝思量古今事安樂是便宜人與之錢則買酒竟醉
莫知所止宿後數載坐化於清源洞郡人泥軀祀之號曰蛇巖
董伯華本屠者遇仙得度服炁煉形精五雷術戲鬻之童子與一
錢則畫符其掌中伸之雷聲殷然成化末坐化於清源紫澤官
人泥軀以祀
僧普足建道場于安溪之清水巖石隙出米工竣而米絕鄉人祀
之禱雨輒應

宋季益廣二王從福州行都航海幸泉州駐蹕港口守臣蒲壽庚
拒城不納壽庚武人寡謀皆兄壽晟主之策定佯着黃冠野服

閩中撫聞

泉州府

十三

入法石山下自稱處士示不臣二姓之意而密畀壽庚以蠟丸
裏降表命善水者由水門潛出納欵於峻都既而元以壽庚歸
附之功授官平章開平章省於泉州壽晟亦居甲第有二書生
踵門自云從潮州來求謁也閩人辭以書寢書生曰願得紙筆
書姓名以報遂各賦詩一首云梅花落地點蒼苔天意商量要
入梅峽蝶不知春去也雙雙飛過粉牆來劍戟紛紛扶主日山
林寂寞閉門時水聲禽語皆時事莫道山翁總不知不署姓名
而去追之不及曾汗失措○蒲姓在元最爲烜赫明祖卽位乃
禁其不得讀書入仕

宋末邱鈞磯居海中小巖嶼著述甚富元遣御史馬伯庸來徵
蔡氏種某自直伯庸使達晉花赤嘗幣至家力辭不屈伯庸取
其著書以去所居之地有石棋局中鐫一聯云萬機分子路一
句笑却回蓋其手筆也

淳化閣帖十卷宋寺南狩遺於泉州已而百刻湮地下久之時出
光怪燈馬驚怖發之卽是帖也故泉人名其帖曰馬蹄真跡洪
武四年知府常性以劉次莊釋文叙而刻之後仁宗命取入秘
府人不可得而見矣又宋少師莊夏家摹一本今俱散闕不傳

夏秦

字西仲

元季進士不知何許人避亂居青陽石鼓山郡守胡器

閩中撫聞

泉州府

十三

與部使者多造其廬洪武十六年召至京師以老乞歸單瓢屨
空處之晏如有送郡守詩離筵對芳草去路遶青山日暮雙旌
遠邦人拭淚看時稱爲二十顆珠

明詩人黃淑清少棄諸生遊四方窮覽名山勝蹟其題詠盡脫烟
火嘗陟華山感希夷遺跡有詩云五季干戈一枕間擔頭天子
起華山陳橋匡海須臾事公在夢中開笑顏後其從弟濂清倅
華州太守會屬僚于此酒酣命賦詩濂清素不工詩書是舊儒以
進舉座爲之闕筆

向鏡山

喬遠

泉趨詩八首有云宋家南外刺桐新鳳凰書室桐塚麒

麟至今十萬編民滿時有當年龍種人矣宋泉州郡設有南外宗正司聚諸王屬今趙姓者多其後

惠安張襄惠岳二十歲登解閩中其時天下省會皆有中官鎮守舉子例合忝謁則皆跪見公長揖而已中官恚口今歲解元豈琉球生耶後成進士官副都御史諫武宗忤嚴嵩氣節既高而經濟文章理學亦備誠一代之偉人也

蔡虛齋清以理學從祀 廟庭賜諡文莊舉解元時清源山鳴如玉磬者三日

傳行人凱出使海外國謁夢九鯉湖有孺子歌曰青草流沙六六

閩中撫聞 泉州府 十四

潛心識之比及番王設宴請曰小邦有一對句願天使屬之曰黃河躍浪三三曲傳卽舉夢語王驚服之蓋中國黃河九曲而彼國有流沙三十六灣彼自謂知中原之勝而吾乃悉彼疆界之詳用是震聳

鄧寒松 名城 少與俞虛江 大猷 為刎頸交讀書清源山上一日夜

深同出山均步月月明如晝萬籟寂靜忽聞石壁間咤咤之聲二人攀籐葛相扶而上見一黑丈夫若呼若召曰吾老猿公也望子久矣遂授以棍法拳法凡數夜而後精習一時有俞家拳鄧家棍之號後二人平倭以武功顯

丹陽有陳少陽祠祀宋太學生陳東也鐵鑄汪伯彥黃潛善赤體
跪庭下泥沙滅膝推不可動南安鄭普過之爲題一聯云丹陛
披肝千古綱常可托荒庭屈膝兩人富貴何爲二像應筆而什
頭抵階階石爲斷

蔡少叅一槐年六歲往姑夫家看燈姑夫試以對曰元宵燈火滿
街衢卽應曰大地文章連斗極後十四歲中鄉試填榜矣主考
慮早達不成令器故不以題名而又令赴鹿鳴宴次科十七始
中

惠安詩人元則進士盧圭齋琦明則山人黃吾野克晦吾野少善

閩中樵聞

泉州府

十五

畫不工詩或謂之曰不工詩不能使畫重乃發憤學詩詩名遂
與沈嘉則王伯穀相上下

鄭半村祐

善鼓琴聞粵東寡婦善孤舟操重繭至粵賃屋比鄰月

餘得聞其音卽按節譜之以歸後遊金陵嘗於月夜揮絃名妓
馬湘蘭竊嘗聽之忽止不彈曰有鄭衛音何也湘蘭再拜乞授
操終以教坊人爲嫌不傳也李卓吾以半村琴與吾野畫稱惠
安雙絕

嘉靖辛卯陳讓赴秋闈求夢九鯉湖是夕無夢廟中道士夢神曰
前度劉郎今又來合其告陳陳亦不解是科陳中解元始知前

科解元劉汝楠陳節前之劉也陳晉江人劉同安人

嘉靖時九廟災詔陳時一陳失御史楊爵疏五事繫獄數月無敢

言者周蹟山天作為一部主事上疏曰求言之道示人以言不

若示人以政陛下令一四司條奏闕失今楊爵所犯在於過直情則可矜古聖王求諫嘗立毀謗之木毀謗非事君之義而帝王不諱者慮下無直言而上不聞過也天子之尊所少者不在唯諸稱頌之滿庭而在憂盛危明之一士在廷諸臣不負此義者獨爵耳願察爵之言原爵之心亟從寬釋不吝採行則人心喜悅天道降康矣疏聞廷杖越二日而斃年三十後賜諡忠愍

閩中撫聞

泉州府

十六

北平扈氏女年十七歸晉江鄧宦某為妾嫡妒閉之幽室數年不得見鄧致乃出之氏奠柩前自經死衣帶有詩云征塵萬里伴夫君冷落深閨哭不聞薄命峨眉終見妬一縑斷送到燕雲又云飛燕伯勞此日分斷腸無計黯銷魂願從蛺蝶飛青草攜手雙雙到鬼門

鄭仰田惠安人

少稚魯不解治生父母惡之逃之嶺南為寺僧種菜

僧復逐之無所歸號泣於野有老僧遇之曰吾遲子久矣偕入山授以青囊王遁射覆諸家之術於是言皆奇中見人無貴賤一揖而外箕踞嘯傲若不知有人步行可逐奔馬遍遊海內至

京公鄉爭延接之魏奄召問休咎時奄覽一方鏡指以爲問答曰四國一人也奄大悅贈以千金出謂人曰吾詭詞以逃死耳向所占者乃囚字也時有斷繩掛梁間指示曰魏某其如此乎未幾忠賢縊死

隆慶庚午鄉試合順天榜泉中登兩元五十八士省元爲同安林奇石北畿領解則晉江李文節廷機先生也是科之彥第進士者二十二人文節則鼎甲拜相爲一代偉人矣

萬曆己丑冬至黃宗伯鳳翔將祇事郊壇齋署中夜與同僚東阿于公富順李公擁榻夜談既就枕夢有投刺者曰于尙書使者

閩中撫聞

泉州府

十七

也開函諦視弗覩名姓刺中有二語云空山一淚憑誰寄萬古孤魂祇自愁讀竟遽覺起以告二公少選浙江巡撫傅公請爲于肅愍易諡疏至于公曰夢徵矣幽明感通一至是耶因請改諡曰忠愍得俞旨輿論慨焉

蔡江門道憲

授長沙司李張獻忠逼長沙重臣大帥皆遁去公獨

誓死固守有尹先民者夙稱名弁因結之以衛民賊至先民竟降公力不能支乃整衣冠北向拜俄爲賊所執獻忠降階語曰我素知公公勿自苦公厲聲怒罵賊釋而又縛者三乃遣先民說之公怒曰朝廷何負爾而反耶踢其齒流血復數賊罪賊知

不可屈遂磔之公從容就戮賊爲流涕氣垂絕猶作忿恨聲賊問何恨曰恨不殺先民耳心血直濺賊面賊爲昏仆久之死年二十九衙卒林國俊等九人侍立不去賊諭不屈皆殺之自一至五引頸受刑四卒忽起曰願葬主而後死賊義之於是四人解衣裹公體血肉狼籍點血在地皆拭之瘞於醴陵陂畢皆自經死賊乃并葬九人于墳側公晉江人字元白諡忠毅

李賊寇亳州晉江忠壯何公燮堅守孤城晝夜不懈賊軍雲梯蟻集城陷被執賊以甘言誘之公強立不屈大罵曰吾頭可斷不可辱也賊斷其足罵益疾復割其胸旋罵旋割仰天呼太祖者

閩中撫聞

泉州府

十八

三賊衆有泣下者嘆曰好烈漢磔死懸其首於市三日耳鼻皆動賊相顧驚愕

康熙一統志云晉江諸生陳顯謨慷慨負大節聞李自成陷京師顯謨具衣冠謁廟解所繫絛自縊明倫堂鐘架學博急解其絛移時息始續顯謨裂眦言曰吾爲此者以大義難逃於天地間耳今救某是不欲成某之志也天耶遂杜門不出

陳綠厓

寶鑰

觀察青州一日燕坐忽有小鬟年可十四五褰簾入

鬢髻朱衣繡半臂鳳背鞞腰佩雙劍曰妾故衡王宮嬪林四娘也早死殯於宮中國破北去妾猶戀故墟今宮殿荒蕪欲假君

亭館延客幸無疑焉自是日必一至但聞笑語酌醉久之亦設
具饌陳及陳鄉人公車十數輩旨酒佳釀不異人世然不知從
何至也酒酣述宮中事甚詳引節而歌舉座沾衣一日告別曰
妾塵緣已盡當往終南來相訣耳自後遂絕有詩一卷程會元
嘉量記其一云靜鎖深宮憶往年樓臺簫鼓遍烽烟紅顏力弱
難爲厲黑海心悲只學禪細讀蓮花千百偈閑看貝葉兩三篇
梨園高唱闕三字君試聽之亦惘然

洪奕懿知會同縣愛民如子人稱爲洪佛先是會人不識海蠶爲
何物每成羣上岍食禾稻瀕海人訝爲鱷魚莫敢捉公至往視

閩中撫聞

泉州府

十九

之曰蠶也取而食之教以烹飪之法自是其俗以爲異味蠶患
遂絕年穀豐登會人建祠海濱以祀公謂其足治此物也今其
俗稱蠶爲洪魚

紫農山人洪承峻太傅承疇季弟爲諸生工詩文尤喜臨池行草
蜿蜒遒縱時人目之曰龍蛇字 國朝定鼎後欲官之辭 康
熙間欲官之又辭時兄方貴盛獨偃蹇巖壑夷然自放不能強
也

榕城詩話云李光坡茂夫安溪介弟隱居不仕潛心經學著三禮
述註

仁廟賜聯云道通月窟天根裡人在清泉白石間亦榮遇也

晉江有賣草翁獨居一室日從市歸則焚香掃地烹茶吟詩以自適一日題詩九日山適邑令繼至誦詩使人物色焉遁去不知所往詩步明人丁少鶴韻云蓮花峰上起孤亭亭白蕭疎峰自靈垂地修藤千丈碧参天古柏萬年青仙蹤秘籙無尋處怪石幽花不記齡他日名山投老去飄然塵外作閒丁翁王姓名傳

閩中撫聞卷四

閩晉江陳雲程孫鵬輯

漳州府

六朝以來戍閩者屯兵龍溪阻兵爲界捕柳爲營江當海之交兩山夾峙波濤激湧唐陳元光遣人沿溪結筏間道急擊遂建寨柳江之西一時土黎歸附轄其地爲唐化里後請於朝置漳州焉詔元光以將軍知州事今郡北威惠廟祀之宋呂琦詩云當年誅賊立殊勳時不旌賢事忍聞唐史無人脩列傳漳江有廟祀將軍

閩中撫聞

漳州府

漳之竈山爲晉葛洪煉丹處多產石蘭黃精昔賢有詩云竈冷烟寒雪滿山葛洪去後尙留丹於今此地多芳草處處花開玉幹蘭石刻今存 國朝朱昆田詩注亦云閩之竈山產一線紅花開對節

唐開元中泉漳二州爭界莫決州官焚香告於天地山川以祈神應俄風雨大至霹靂一聲崖壁中裂柘爲一逕中有篆六行二十四字曰漳泉二州分地太平永安龍溪山高氣清千年不改萬古作程永安龍溪兩郡界首鄉名也

蒲葵關在漳浦西南四十里卽盤陀嶺漢時南越故關也唐嶺南

節度楊發寓驛樓聞李德裕貶崖州時有詩留題尋訪得之驛吏重扁其詩并和之李云嵩少心期杳莫攀好山聊復一開顏明朝便是南荒路更上層樓望故關楊和云南盡封郵見好山蒼蒼松桂類商顏誰憐後夜相思處白草黃楊舊漢關

周匡物題古鏡歌有欲向高臺對鏡開不知誰是孤光主句時宰王播見而異之元和十一年播舉匡物及第爲漳人登進士之始

周匡物登第一時同擢者三十三人有贈之詩云元和天子丙申年三十三人共得仙今漳南五里有名第院祀匡物而山又有

閩中撫聞

漳州府

得仙亭蓋取贈詩語也

周匡物以詩詞著名家貧徒步應舉落魄風塵路經錢塘江之儻船之資久不得濟乃於公館題詩云萬里茫茫天塹遥秦皇底事不安橋錢塘江口無錢過又阻江陵兩信潮郡牧出見之乃罪津吏後津渡尙傳此詩舟子不敢取選舉人錢者自此始也咸通四年漳州押衙王嗣建塔於開元寺宣義郎前建州司戶叅軍劉鏞書佛頂尊勝多羅尼經於塔上後列漳州刺史柱國崔袞大德僧義中等姓名鏞書結法遒勁有晉人風致漳南金石刻文此爲第一

唐刺史張登詩云孤高齊帝石瀟酒晉亭峰按梁山蓮花峯有石
為齊武帝所賞亭為晉葛洪所居故名

漳浦勸自勵夫寶隨軍安南十年乃返聞妻於是夜他婚憤怒仗
劍詣之將至暴雨天晦電光中見道左有空心樹入避之少頃
聞有呻吟聲來者問之答曰妾林氏夫勸自勵從軍未還而父
母逼嫁以今久成婚我不從避於屋後為虎所逼至此自勵曰
我即勸自勵也相持而泣頃之虎至以劍刺虎負林還家

康仙廟在員山琵琶坂郡守欲移於山椒忽夢仙授以詩曰賣藥
因循未得還却因耽酒到人間有心只戀琵琶坂無意更登山

閩中撫閩

漳州府

三

上山廟遂不移

梁大同六年有群龍浴於城北溪中故溪名群龍溪宋郡守王冕
所貢珠得之於此又有潛翁者在此養鶴後仙去黃子真詩云
鶴鳴一去今何在龍戲溪頭不可尋

岳武穆幼女許配漳浦高東溪登四子武穆被收遂抱銀瓶赴井

死世傳銀瓶小姐是也按察梁大用亭覆其井榜曰孝娥劉瑞
銘之略曰天柱斃日為月禍忠良父冤莫雪赴井抱瓶泉化血
曹江之娥符爾節噫嘻井可竭泉名不可滅按東溪官趙功郎
亦以忤檜削官徙容州死朱文公疏請褒之

淳祐九年漳州通判柯述賑飢活民感二鵲栖於廳事述去鵲亦送之因名瑞鵲堂蘇東坡詩云柯侯古循吏湘幅真無華仁心格異物兩鵲栖其衙是也柯晉江人

臨漳臺在紫芝山之顛據溪山奇勝處朱文公守漳日欲築廬不果後守危楨作龍江書院陳淳詩云臺前一帶繞漳溪臺下廻環萬象齊

德祐元年謫賈似道建州居住在翁合崇安人上言建寧實朱子講學之地三尺童子亦知向方聞似道名咸欲嘔唾况見其面乎乞遣投荒昧以禦魘魅遂責受高州團練使循州安置籍其家遣

閩中撫聞

漳州府

四

使監押之貶所會稽縣尉鄭虎臣福安人以其父嘗為似道所配欲報之忻然請行時似道寓建寧之開元寺侍妾尚數十人虎臣至悉去之撤轎蓋暴行烈日中令昇輿夫唱杭州歌謔之每名片似道窘辱備至舟次南劍州黯淡灘虎臣曰水清甚何不死於此似道曰太皇許我不死候有詔即死一日入古寺壁上有吳潛南行所題字虎臣呼似道曰吳丞相何以至此似道慚不能對十月至漳州木棉庵虎臣拘其妾與子於別館即廁上拉其胸殺之陳宜中至福州捕虎臣斃於獄

吳履齋潛安置循州似道尋除劉宗中知州事而履齋不免及似

道死木棉庵適門下客趙介如守漳往哭焉爲之經紀其喪其詞云嗚呼履齋死循死於宗申先生死閩死於虎臣抵此四句而哀激之恫無往不復之意俱寓其中

賈似道爲相置公田關子法病民太學生富春葉李率同舍生上書攻之賈嗾其黨誣以罪竄漳州似道南謫會李赦歸遇於洛陽橋上贈以詞曰余歸路公來路天理昭昭胡不悟公田關會竟何如仔細思量真自悟雷州戶崖州戶人生會有相逢處客中邂逅少蒸羊聊贈一篇長短句

木棉庵在漳城南二十里明俞大猷立碣書宋鄭虎臣誅賈似道

閩中撫聞

漳州府

五

於此過客題詠甚多元湯益詩云檀板敲殘月上花過墻荆棘刺簷牙指揮已失鐵如意賜予寧存玉辟邪破屋春歸無主燕廢池雨長在官蛙木棉庵外猶愁絕月黑夜深聞鬼車無名氏和之云榮華富貴等浮花弩力難勝國爪牙漢世但知光擁立唐朝誰識杞奸邪綺羅化作春風蝶絃管翻成夜雨蛙縱有清漳人去也碧天難挽紫雲車

宋漳浦李氏以詩名姊大李亦能詩相與倡和有汲水書懷二首汲水云汲水佳人立曉風青絲展盡轆轤空銀瓶觸破殘妝影零亂桃花滿井紅書懷云門對雲霄碧玉流數聲漁笛一江秋

衡陽雁斷楚天濶幾度潮來問過舟

元合魯溫侯諱迭理淵實仕漳州路達魯花赤洪武元年兵入閩
總制納降俄而報新朝使者至侯乃朝服北面再拜曰臣四十
始仕不數年致仕二千石國恩厚矣今力不能禦敵義不忍降
報國恩者惟有死爾遂斫其印篆書其笏曰大元臣子置几上
引刀自刎歿猶執刀按膝坐毅然如生時福建僉院柏帖木耳
亦殺妻子自焚人以與陳有定稱閩三忠

閩省一榜三及第者明宣德庚戌狀元長泰林震榜眼寔安龔錡
探花莆田林文

閩中撫聞

漳州府

六

長泰戴方伯燦詞林宗工也題三蘇詞云一門父子三詞客千古
文章四大家極爲妥貼

陳剩夫真晟以布衣上程朱正學纂要不報家於漳之玉洲郡守
彭恒立石道旁以表之 國朝張士楷作懷古詩布衣陳子出
清漳一紙圓圖感睿皇此理已通天地極伊人宛在水中央如
何兩疏歸黃閣只博孤碑鎮白楊自是大臣多絳灌至今遺恨
李南陽剩夫泉州人移家於漳故自稱泉南布衣

岐山有萬松關初陳克聰植竹以憩行人萬歷間督學沈焮名曰
堆雲嶺崇正二年漳守施邦曜築關額曰天寶維垣登其堞可

望海下則鄴山書院爲明黃石齋先生講學之所有蓬萊
雨巖諸勝

長泰天柱巖有石柱高二丈餘又有石屏風高九尺濶五丈上刻
天柱巖三字東西南北俱有石門及石室石庫石梯諸勝明邑
令叙觀梅樓名人題詠甚多○郡志云明黃文史讀書于天柱
石室

芝山朱子祠東祀教授陳先生西祀石齋黃先生皆以門人配文
勤蔡公爲之記略云當明文皇纂位詔至漳教授陳先生名思
賢升明倫堂鳴鼓集諸生曰此堂明倫今日君臣之義安在諸

閩中撫聞

漳州府

七

生從之者陳子應家曾子廷瑞林子旺伍子性原鄒子君默呂
子賢線絳設位爲舊君哭臨如禮當事執送京師咸以身殉追
明運旣終石齋先生抱剛直不回之氣丙戌三月五日死於金
陵及門蔡子春溶賴子繼謹趙子士超毛子玉潔繼至抱其頸
哭曰師乎魂其少須吾卽來矣四子同時就義嗟乎君臣之義
師弟之情無所逃於天地之間吾漳鬱積清奇代多偉人一則
抗節於明初一則殉身於明季其精英靈爽雖謂之百世不死
可也

方靈臯紀石齋先生逸事云黃岡杜蒼略先生客金陵習明季遺

事嘗言崇正末年余中丞集生與譚友夏結社金陵適石齋
公來遊與訂交意頗洽黃公造次必於禮法諸公心嚮之而苦
其拘也思試之妓顧氏國色也聰慧通書史撫節安歌見者莫
不心醉一日大雨雪鴈黃公於余氏園使顧佐酒公意適無忤
諸公更勸酒劇飲大醉送公臥持室榻上枕衾茵各一使顧盡
弛褻衣隨歸戶諸公伺焉公驚起索衣不得因引衾自覆薦而
命顧以茵臥茵厚且狹不可轉乃使就寢顧遂暈近公公徐曰
無用爾側身內向息數十轉即酣寢漏下四鼓覺轉面向外顧
佯寐無覺而以體傍公俄頃公酣寢如初詰旦顧出具言其狀

閩山撫聞

漳州府

八

且曰公等爲名士賦詩飲酒是樂而已矣爲聖爲佛成忠成孝
終歸黃公及明亡公繫於金陵在獄日誦尚書周易數月貌加
豐正命之前文有老僕持緘線向公而泣曰是我侍主之終事
也公曰吾正而斃是爲考終汝何哀故人持酒肉與談飲啖如
平時酣寢達旦起盥漱更衣謂僕某曰曩某以卷索書吾既許
之言不可曠也和墨伸紙作小楷次行書幅甚長乃以大字竟
之加印章始出就刑其卷藏金陵某家顧氏自接公時自懟無
何歸某官李自成破京師謂其夫能死我先就縊夫不能用語
在縉紳間一時以爲美談焉

黃石齋繼室蔡玉卿讀書知大義公繫獄時玉卿寓書謂天王明
聖不日靈顏語不及私公出關復致短札云自古忠貞豈煩內
顧身後之事玉卿圖之公歿遣長子偕門客之江南得齒髮以
歸葬北山墓側雖流離播越不脫縲絰長齋二十載卒年八十
三五卿善臨池代公作行草幾欲奪真然皆署公名晚年乃自
署亦不輕與人也詩文多不自傳惟得其寄鄰母及憤慨數章
黃子寅清漳竹枝詞云花卉千舛錯繡文蓋頭紗帕白羅裙海濱
鄒魯今猶昔不見巫山一段雲注漳俗婦女出門必以布帕蒙
首夙稱海濱鄒魯

閩中撫聞

漳州府

九

閩中撫聞卷五

閩晉江涼雲程孫鴻輯

延平府

漢時邵武庸嶺北濕中有大蛇爲人患巫言神啖童女乃可饜前
後嚮送凡九人將樂李誕有少女名寄受令長直應之自買好
劍作數石米飯以蜜澆之置諸穴蛇夜出食餌目光如鏡寄放
犬咋之從後以劍斫之蛇踊出而死東越王聞而壯焉聘以爲
后

晉雷煥得二劍於豐城獄中一與張華一留自佩華報煥書曰詳

閩中撫聞

延平府

觀劍文乃干將也莫邪爲何不至天生神物終當合耳華死失
劍所在其後煥子爲建安從事佩劍經延平津劍忽躍入水使
人浚水求之見兩龍相隨人謂雙劍復合云

丁焯登延津城樓詩云澄潭龍老已千秋夜夜寒光動斗牛有客
携琴瞻碧漢何人說劍向滄洲孤城削壁全臨水八面無山不
到樓取次高懷生遠致一聲長嘯起驚鷗丁爲觀察雁水焯之
弟晉江人

王鈞劉將軍廟碑文略云將軍者五季時閩王審知部將劉瓚也
將軍從審知起固始王閩中審知殂諸子相殘內難屢作巨寇

乘之橫潰莫支留從効送款於金陵李仁達投降於吳越將軍擁孤軍奄處屬郡旣度其王之不足以有閩又度其力之不足以摧敵群黎依之倉皇失謀萬歲之呼黃袍之加忠臣不能無動焉茲朱文進之所以失國陳橋之所以代周也邨溫序之鬚以自裁酒侍中之血以見志者誰焉嗟乎將軍不以一時南面之樂而易其生平報主之忠不以同盡有限之生而喪其永存不死之氣要之輕重素明取合素定可貧可賤可殺之植於天者素完故生乎濁世而不知其光迫於機宜而不怵於利蹈乎過涉而必殘其軀其慷慨激烈較之歐史所稱王彥章裴約劉

閩中撫聞

延平府

二

仁瞻三君子者彼曷以加焉

青邱石在尤溪宣化門前平水灘唐異僧黃涅槃過此留偈云塔前青邱見家家親筆硯水流保安前尤溪出狀元先是尤溪未有登第自宋林積登慶歷六年進士第邑人始知學宣和中士風漸盛南渡後青石如邱則比戶絃誦矣石高丈餘

廖剛居順昌靖安郡世享眉壽五代相見作堂扁曰世綵士女夫賦詩羨之高宗御覽諭之曰昨見卿家世綵堂詩集可爲人間羨事及剛歿子遲復構堂曰羨事以識天語

楊龜山時舉進士聞程明道講學河洛以師禮見及歸明道目送

之曰吾道南矣明道卒又師事伊川一日見師腹車與游定夫
醉侍立不去覺則門外雪深三尺矣歸杜門不仕者十年後官
至國子祭酒有奉使高麗者國王問龜山先生安在

廖正一字明略人將樂元豐間與晁補之同榜晁贈詩云十年山林
廖居士今隨詔書稱舉子文章宏麗學西京新有詩聲似侯喜
元祐中召試館職除正字東坡大奇之故名亞於蘇門四學士
後入元祐黨

陳了翁嘗言蔡京若秉鈞軸必亂天下後爲都司力排蔡氏之
黨一日朝會與蔡觀語云公大阮真福人也問何以知之了翁

閩中撫問

延平府

三

白適見於殿庭目視太陽久而不瞬觀以語京京謂觀曰汝爲
我語瑩中既能知我何不容之甚也觀致京語於了翁徐應之
曰射人先射馬擒賊先擒王觀嘿然後竟有郴州之命

侍郎巖舊名翠雲宋熙豐間張侍郎駕楊祭酒時陳司諫瓘讀書
于此相傳三君讀書時不置臥榻歎粥飲水終歲不到巖下
胡器之進士璞經采石題詩吊李白云當時醉弄波間月今作寒
光萬里流東坡見之疑爲唐人所作

鄧志宏蕭號柝欄與朱韋齋松交好一日韋齋鴈客柝欄以冠帶
寓之醉起韋齋留以質紙筆明日如約韋齋愛筆還冠而紙少

留帶曰倘無千幅竟不還柝欄為寄一詩云歸帽納毫真得策
要箋留帶計還踪公如買菜苦求益我已忘腰何用渠閉戶羽
衣聊自適推窓柿葉對人書帝都聲價君知否寄與新傳折檻
朱其風流調笑如此

尤溪有文山公山隔溪相對邑人義齋鄭氏居此宋朱韋齋為尤
溪尉任滿假館鄭氏建炎庚戌九月十五日文公生焉先是二
山草木繁密及公生野燒同時焚山山形畢露儼若文公二字
延人每於春水後視龍洲沙多寡占歲豐歉宋黃裳詩看此黃龍
沙陡起滿城歌吹入豐年

閩中撫聞

延平府

四

將樂天堦山有玉華洞為赤松子採藥處窈深繚曲遊者當秉炬
以入中有六洞泉流石間怪石萬狀類世間人物產藥材甚多
其陰有洞曰寶華陽有洞曰南華世稱三華明楊載鳴謫尉于
此作遊記

陳氏永安黃貞履妻夫死自縊明巡道查豹改觀音閣為氏祠為
詩曰人間處處觀音閣天下寥寥節婦祠除却金身祀木主不
知公論是耶非

徐尙卿南平人萬歷戊午舉人崇禎間守劍州獻賊渡河破昭化請
援不至尙卿繫印左肘曰此君命也存亡與其登陴督戰矢石

俱盡乃北面再拜曰臣力竭矣以血書襟帶曰孤城不可守仗
節死者恩鼠竄豈無計殊羞衾影存自經於城樓上賊入戒勿
毀其衣冠

閩中撫聞卷六

閩晉江陳雲程孫鵬輯

建寧府

武夷山在崇安縣南道書謂第十六洞天峯巒大者有三十六列仙傳以爲錢鏗二子長曰武次曰夔同居是山因以爲名漢武帝設壇祀之祭用乾魚魏王子騫以求仙訪道來此繼而張湛等十二人亦以修鍊至推子騫爲地主相與修隱今會真廟所祀之魏真君是也十二人者張湛孫綽趙元彭令昭劉景顧思遠白石先生馬鳴主胡氏李氏二魚氏

閩中撫聞

建寧府

紫陽有武夷九曲擢歌九曲謂升真洞玉女峯仙機石金雞巖鐵笛亭仙掌峰石唐寺鼓樓巖新村市

秦始皇二年八月十五日武夷君置酒般會鄉人於幔亭峰上如期往見山徑平坦虹梁駕空山頂有幔亭綠窻玲瓏隱映可數百間空中有呼鄉人爲曾孫者既而聞羣仙奏樂行酒進食珍奇皆非世俗所有令唱人間可哀之曲詞曰天上人間分會合餘日落西山兮夕鳥歸飛百年一瞬兮志與願違天宮咫尺兮恨不相隨歌罷彩雲四合瓊珮人馬之聲亘空而去下山風雨暴至回顧無復一物但葱翠峭拔如初耳

虹橋板在武彝峰窩處遍插有直若柱笏垂若懸旂者有若未拱若丹楹若雕欄者自秦至今風雨摧凌不朽不墜好事者百計攀取不獲嘗有雲氣出沒其中

楊億家集載真神哲三宗皆自十三仙中出世真人吳懷玉亦嘗醉指武彝君像曰應世人主實在戊子未幾哲宗登極果符其年又指魏真君像曰三十有八載當應平四海後果然是以陳覺民過武彝詩云昇真洞口接天門靈草丹花日日春聽說列仙來瑞世三朝德澤在斯民

漢梅福壽春人元始四年至甌寧結廬城南西望郭巖嘆曰紫雲閣中撫聞
建寧府
二
之下必有異人訪之得岐公授以丹錄數載道成冲舉而去鄉人因採其姓以名里曰梅岐云

白玉蟾或云姓葛名長庚閩清人爲文頃刻萬言善草書足跡半天下遇泥丸真人陳翠虛授以丹訣後居武彝山嘗自讚曰千古蓬頭跣足一生服氣餐霞笑指武彝山下白雲深處吾家宋嘉定中詔徵入仕封紫清明道真人館太乙宮一日忽不知所往

鐵笛亭舊名奪秀在武彝山中胡寅與隱士劉衡遊此衡善吹笛有穿雲裂石之聲寅詩有更煩橫鐵笛吹與衆仙聽之句後廢

朱子借客尋其故址道有笛聲發於林外悲壯回鬱巖石皆雲
追感舊事因作亭以鐵笛名之

練夫人名鸞浦城章仔鈞妻仔鈞仕閩屯兵縣之西慶南唐來侵
遣二校請師失期欲斬之夫人勸得免二校奔南唐爲大將卽
邊鎬王建封也南唐伐閩仔鈞歿已久二校遣使送金帛遺以
白旗曰吾欲屠城夫人植旗於門已戒軍士勿犯矣夫人還其
旗併金帛曰君幸念舊德願全此城必欲屠之吾家不忍獨生
二校感其言乃止曰夫人之仁必昌厥後

楊侍讀徽之以能詩聞宋太宗知其名索其所著以百篇獻上卒

閩中撫聞

建寧府

三

章曰少年牢落今何幸叨遇君王問姓名太宗和賜且語群臣
曰徽之文雅可尚搢履端正拜禮部侍郎選十聯寫於御屏梁
周翰詩曰誰似金華楊學士十聯詩在御屏風

楊大年億之初生也母章氏夢羽衣人自言武夷仙托化旣誕則
一鶴雛也盡室驚駭貯而棄之江其叔父曰吾聞間世之人其
生必異美嫺有棄簡狄有契是共類也追至江濱鶴已蛻而嬰
兒焉取以歸體有紫綫長尺餘彌月乃落

宋時才朝致祭皇后文楊大年捧讀空紙無一字隨自撰曰惟靈
巫山一朵雲閩苑一團雪桃源一枝花秋空一輪月豈期雲

雪消花殘月缺伏惟尙饗仁宗大喜其才敏給有壯國體

趙抃令崇安時植梅於後圃後人立石刻清獻梅三字并爲銘曰
召有棠棣有柏趙公之梅刻以石元彭好古構亭其上又縣門
有清獻松亦抃所植徐九思詩他年留入詩人筆不減西周蔽
芾棠

臨川王益尉松溪生安石子尉司李忠定編母夫人由龍泉歸亦
生公於此

徐道博學尙氣崇寧二年爲特奏名魁時已老矣赴聞喜宴歸騎
過平康同年所簪花多爲群妓丐取惟適花獨存因戲題一絕

閩中撫聞

建寧府

四

云白馬青衫老得官瓊林宴罷酒腸寬平康過盡無人問留得
宮花醉後看

章惇妻張氏浦城人惇之入相也張病且死囑之曰君作相幸勿
報怨張歿後惇語陳了翁曰悼亡不堪了翁曰與其爲無益之
悲孰若念臨終之言惇無以對

袁機仲樞未第時嘗題南鄉橋云玉龍倒影掛潭隈人在雲霄大
地間借問是誰題柱去茂陵詞客到長安袁後兩以詞賦取魁
元

袁機仲試禮部詞賦第一出爲嚴州教授龔茂良取其所撰通鑑

紀事本末以奏孝宗讀之以賜東宮及江上諸帥令熟讀之後
分修國史章學家因其同里請文飾其詞機仲曰子厚爲相負
國欺君吾爲史官寧負鄉人不可負天下後世也

吳棫字才老建安舉進士後不仕築室三間中設夫子像古書陳
前謝事凝神以味古訓著有書稗傳詩補音論語指掌考異續
解楚詞釋音韻補又作字學補韻朱文公謂近代訓釋之學惟
才老爲優遂據以叶三百篇之韻

建寧三桂里有考亭書院祀朱文公先是韋齋過考亭愛其山水
清邃欲卜居之紹熙中晦庵築室以成父志復建竹林精舍更

閩中撫聞

建寧府

五

名滄洲淳熙甲辰御書考亭書院四字扁其門明宣德間以善幹
蔡元定劉焞真德秀配

五季亂黃瑞公子稜隨父禮部尙書入閩見建陽山水秀麗因家
焉子稜詩云青山木笏尙初官未老金魚是等閒世上幾多名
將相門前無此好溪山市樓晚日紅高下客艇春波綠往還人
過小橋頻指點全家都在畫圖間父歿塋於三桂里子稜乃築
亭於半山以望其考文公居近其地世遂以考亭稱之閩小紀
謂後人誤認急宜改正

紫陽舊宅在崇安縣東公扁其廳事曰紫陽書堂以新安有紫陽

山示不忘故土也寢堂曰韋齋皆以父命名之晚年始移居老
亭元葉善夫詩峩峩雲谷山淼淼滄洲水中有宅一區過者視
闕里

宋韋齋詩有鄉園落日蒼茫外樽酒寒花寂歷中之句歿後文公
奉塋於五大里復遷塋寂歷山中幾似詩識行狀中言此

朱文公墓在九峯山下大松谷先是公嘗夢曰龍居後塘乃先生
歸藏之所後得地果名後塘妻劉氏先卒公定其穴曰宰木亭
而自營壽藏於側總名其庵曰順寧有石塘雪中詩春風欲動
客辭家霖潦縱橫路轉餘行到溪山愁絕處千林一夜玉成花

閩中撫聞

建寧府

六

慶元庚申公卒遂合塋焉

太平山二十里有寒泉林朱文公母祝夫人墓在焉其右為宋劉懋
母墓世傳懋越鄉授徒歲暮得七金歸道逢孕婦携兒欲赴水
死問之曰夫婦不相存債迫到此問債幾何曰七金即解與之
及守歲荔酒炙蝦夫婦相對了無慍色且為詩曰蝦小紅爐炙
酒熟布裙荔正歲之夜途有續題其門曰門將金鎖鎖簾捲玉
鉤鉤居數日有以佳壤告者曰金鉤掛玉簾形也懋以塋母而
文簡煇文安炳兄弟生焉

建中人物萃於一門者如胡文定安國及從子致堂寅籍溪寅子

五峰宏寧茅堂寧號胡氏五賢劉忠顯幹及子忠定子羽孫忠肅

珙族人忠簡頴忠烈純號劉氏五忠而屏山子暉白水勉之爲

朱子之師文簡煥文安炳師事朱子卓卓可傳他如蔡西山元

定及子節齋淵九峰沆復齋沆亦皆道學之著者

蔡元定結廬西山之麓忍饑讀書時晦庵寓雲谷每有疑難頻相

過訪宋理宗御書西山二字表之刻於西南崖上

劉珙少時嘗夢謁大乾惠應祠金牌上有曲巷勒回風五字未曉

所以迨登第除諸王宮教授一夕帝幸宮邸問諸王何業珙答

以屬對時月照窓隙帝曰可令對斜窓拘明月諸王方思索間

閩中撫聞

建寧府

七

珙遽以曲巷勒回風對帝曰此神語也

柳永字耆卿崇安人初名三變爲舉子時多遊狹斜善爲歌詞教坊

樂工每得新腔必求永爲詞始行於世於是聲傳一時舉進士

官屯田員外郎仁宗誕辰太史奏老人星見永爲醉蓬萊詞以

獻語不稱旨曰此人不宣仕宦且去填詞因自稱奉旨填詞柳

三變流落不偶死之日囊無餘貲群妓劇金墓之真州郊外仙

人掌每春月上塚謂之吊柳七

謝枋得號登山弋陽人知信州與元兵戰不利變姓名入建寧唐

石山麻衣躡履東向而哭不識者疑其病狂後賣卜建陽市通

都橋上委以錢不受惟取米屨而已元使人聘之致書辭強迫
至燕不食而死妻子弟姪亦死兄君平在九江不屈亦斬於市
丁顯字彥偉人建陽洪武中會試第三人及廷試顯居首練子寧次
之黃子澄又次之光是夢三絲墮地將臚唱乃以花綸易子澄
三人姓名俱有絲上喜甚俱賜狀元

二藍學文於武彞杜清碧學詩於四明任松鄉其體格規法唐人
間入中晚蓋十子之先閩中詩派實其昆季倡之明之智官按
察僉事而靜之个退隱稱武彞山長其戲題絕句云朝野文章
自不同壤歌何敢敵黃鐘山林別有釣天奏長在松風澗水中

閩中撫聞

建寧府

八

靜之有藍山集明之有藍澗集

閩石貧生客京師饑寒濱死然頗善丹青不能售一錢以兩幅獻
於楊文敏榮公題其上而還之詩云誰家老屋枕溪濱十里青
山半是雲此處更無塵跡到祇應啼鳥隔花聞小橋流水漾晴
沙策杖歸來日未斜昨日東風花落盡一林高樹鎖烟霞明日
張此畫于市價遂湧人爭延致因而饒裕

趙季西題丹青閣云跨壑飛簷屋數楹上橫山色下溪聲等閒題
作丹青閣未必丹青畫得成閣在甌寧開元寺左

政和徐貞一號元虛子能詩嘗過仙霞關關吏訝其異服執之貞

一瞪目不答吏繫之邴亭迨夜給守者出袖中出大筆書二絕於壁云一劍凌空海色秋玉皇賜宴紫虛樓醉來跨鶴瀕彌頂指點培塿見十洲碧殿歌傳阿濫堆玉笙吹徹海桃開仰天一笑江風發笑接白雲歸去來乘夜遁去晨起盛傳仙人至關走看墨跡不絕於道

章才邵性喜賦詩嘗題嚴子陵釣臺云短掉夷猶七里灘人亡依舊水光寒漢家名節君知否盡在先生一釣竿時以爲佳作

翁邁年十三爲建寧舉首邑宰歐陽竦欲試其才令屬對曰筭出錯鑽天芥云草生釘釘地逮鹿鳴宴郡守令小妓就之覓詩邁

閩中撫聞

建寧府

九

戲題曰年來十三四嬌羞懶舉頭爾心還似我全未識風流守大稱賞

范川莊

崇安人

善畫有欲薦爲金門畫士者川莊自忖曰嚴廊畫工必極天下之選豈易應耶乃遊金陵謁金門畫客程姓者願傭門下洗硯滌筆執事左右許之川莊觀其畫出已下一日味爽往汲奔歸程詢之曰適見羣怪其能形容請貌之紙程見其備寫幽怪屈伸摩挽奔跳之狀大驚曰子吾師也遂下拜

徐氏名彩鸞浦城人每誦文文山六歌歔歔泣下至正間賊犯浦城欲殺其父氏願代死賊義釋之願語父曰速去兒必死賊拘

至桂林橋拾炭題壁曰惟有桂林橋下水千年照見妾心清
接橋下死世又傳其寫懷詩云萬水千山去路賸青鞵踏破幾
層沙登山絕頂重逢嶺渡水愁深又沒涯雁字只傳夫與子魚
書難寄母和爺回頭遙望鄉關處雲下峰前是我家苦調悽音
願得信國遺意

舊傳江淹爲吳興令夢郭璞授筆吳興卽浦城也今其地有夢筆
山房爲真西山建魏了翁爲記又有人題夢筆驛云一宵短夢
驚流俗千載高名掛里閭遂使晚生矜此意癡眠不讀半行書
建寧府治對山爲鐵獅山山有庵鑄鉄文殊獅子像術家謂府治

閩中撫聞

建寧府

十

山脉如猛虎出林溪西諸山若隊羊然恐爲所傷乃於對山鑄
鐵獅以鎮之宋宣和間移置開元寺未幾葉范二寇繼作且有
虎渡溪紹興間乃遷還故處

鳳凰山在郡城東形如翔鳳當鳳唼處有石蒼潤堅緻如玉可取
爲硯對峙者爲龍山僞閩龍啓中製茶焙引二山之水瀝爲兩
池池中有紅雲島宋咸平中丁晉公所作四面遍植海棠每旭
日初升時晴光掩映若紅雲浮於島上

灤城集云北苑茶冠天下歲貢龍鳳團然不得鳳凰山唼瀝水則
不成潭中石蒼黑堅如玉以爲硯與筆墨宜世初莫知也熙寧

中太原王願始發其妙吾兄子瞻始名之然石性薄厚者不及寸晷後得此長博豐碩蓋石之傑子瞻方爲易傳日效於前與有功焉銘曰陶土塗鑿崖石元之蠹頰之賊涵清泉閔重谷聲如銅色如鐵性滑堅善凝墨棄不取長嘆息招伏羲揖西伯發秘藏與有力非相待誰爲出

建安北苑茶焙在鳳凰山麓僞閩時張廷暉以其地宜茶悉表而輸於官官私之焙凡千三百三十有六崇安御茶場在武夷二曲之西元時初設前岡有龍井石泉一泓甚清冽明洪武間重修歲驚蟄日邑令率屬祀山神畢令執事鳴金鼓揚旗同喊曰

閩中撫開

建寧府

十一

茶發芽自是龍井之泉漸發而溢造茶畢漸渾而縮 國朝周亮工閩茶曲云龍焙泉清氣若蘭土人新樣小龍團盡誇北苑聲名好不識源流出建安御茶園裡築高臺驚蟄鳴金禮數該那識好風生兩腋都從着力喊山來

南浦溪在浦城縣北以江淹得名溪中有鳧綠潭潭上有綠波亭 邑志載詩一首甚佳南浦春流漲綠波溶溶漾漾浴鷗多銷魂 尙記江淹賦碧草青苔送別何

春泥滑滑雨絲絲一路陰寒少霽時水入陂渠喧似瀑雲從山崦上如炊撩衣去傍田家火炙燭來看野店詩落盡寒梅心事惡

獨搔蓬鬢，遶殘枝，劉克莊宿漁梁詩也。漁梁在浦城樂平里洞。天記天下十名山，漁梁其一也。

國朝查慎行有建溪棹歌節錄數首云：不爭白狗黃牛峽，不數西江廿四灘。天下無如建溪險，水中刀劍是峰巒。連山苦竹賤如毛，十節量成二丈高。小泊南鴉南口子，船船多換幾張篙。青天白日走雷霆，黯淡危灘最有名。掣雷光中行十里，船頭一轉卽延平。自從舟發崇安縣，直到洪塘與海通。若使一灘高一丈，幔亭合在半天中。

閩由浦城往浙必度仙霞嶺，高三百六十級，凡二十八曲，長二十

閩中撫聞

建寧府

十三

里宋史浩劄聞過此始募斲石路行者便之

閩中撫聞卷七

閩晉江陳雲程係鴻輯

邵武府

劉海蟾名元英唐時以明經事燕劉守光爲相崇尚黃老後得正陽子金液還丹之秘卽解裝易服遁跡終南山丹成尸解嘗以道力除蟾崇因稱海蟾

五代李安期以詩名遨遊江湖嘗謁四川茶馬使王涯因賦白鷺云漁戶家風不設罾錦鱗爲飯水爲羹銀袍只當篔簹衣着自在江湖過一生涯奇其才欲薦之因奕爭道安期推枰曰公平章

閩中撫聞

邵武府

天下亦可如是反覆乎遂拂去

李巽字仲權以屨樓士鼓周處斬蛟三賦馳名累舉不第爲鄉人所侮曰李秀才應舉空去空回知席帽甚時得離身巽亦不較至第乃遺鄉人詩云當時踪跡困泥塵不意乘時亦化鱗爲報鄉間親戚道如今席帽已離身蓋宋初猶襲唐風士子皆曳袍重戴出則以席帽自隨後仕至度支郎中兩浙轉運使

黃通風韻瀟灑騎牛吹鐵笛浩歌長嘯衆目爲異人有賦元夕燈火詩者通病其語未壯自作云秦樓十二玉梯橫紫府千門夜不扃疑是嫦娥弄春色彩雲移下一天星世稱其雄偉通登夏

祐二年進士韓琦范仲淹薦其才除大理寺丞

邵武縣學有榴一株士人每占其結實之數以驗科第熙寧三年樹杪結實差大附枝結雙實者凡十有四歲廷試葉祖洽上官均登上第何與京與狷兄弟暨郡人登第者十四人祖洽有詩云已分桂葉爭雲路不負榴花結露枝蓋謂此也咸淳中邑令洪潮建瑞榴軒

李忠定綱忠義勳業照耀千古人但傳其奏牘耳至其爲詩氣格雄渾才情宛至如和東坡四時詞云美人半醉軟玉肌不語憑欄知恨誰莫把春愁自銷損且唱尊前金縷衣又云綠影沉沉

閩中撫閣

邵武府

二

清晝永畫屏玉枕冰肌冷曉轡驚起寶釵橫香篆浮烟簾幙靜翠眉不爲擗心鬢鬢亂香殘約略勻情似楊花無定處可憐金谷墜樓人春意詩云春鳥窺綠窓踏落庭前花美人爲之笑鬢脚風中斜不惜花前殘只愁鳥驚去吃啞背人飛林深無覓處想其風韻殆不類爲人斯亦宋廣平賦梅花之比也

李忠定讀書樓在霞巖林松址豫吉有詩云河東河北水分流

塞馬邊笳落愁東吳塵沙留二聖人亡風雨見孤樓詩書此日君親志悵恹他年戰守謀誤國由來多白面如君萬卷可無羞

謝堯仁字夢得以文詞詩律遊江湖淳熙改元薦於鄉其體金山
詩云夜半鬼神朝水府五更鼓角動揚州大爲張于湖所知
饒幹少從紫陽受學後知懷安軍卒有銘曰能琢磨而器吾之玉
乎則心皇皇如不足能煇赫而丹吾之較乎則足踳踳如不欲
故樂也不加若性而污也不懼其辱是謂善學朱氏者蓋不惟
其名而惟學之篤

泰寧天湖巖有九巖居此鳳山蕭三休參三愛岳衲翁必進駭室
必大良齋奇樵丈人仁子野若鳳滄浪羽俱能詩滄浪著有詩
法傳於世其先有嚴粲者著詩緝紫陽詩傳多採其說○滄浪

閩中撫聞

邵武府

三

逋客與三休居士樵丈人亦號三巖

詩話樓在邵武東樓上卽望江樓也宋邑人嚴羽與客巖石屏談
詩於此世所傳巖滄浪詩話是也 國朝順治間周櫟園亮工
令人奉羽像祀其中有寒食登詩話樓感懷詩云到來風雨半
周星開遍桐華涕自零病榻惟臨乞米帖荒城早發種魚經羽
書夜報溪雲黑鉄騎朝馳積草青不見當年作賦客遙聞新鬼
泣郊祠

越王臺在邵武城東北傳爲越王校獵之所樵牧者時得古瓦皆
羅紋雁翅扣之堅如金石元黃鎮成詩北平山上越王城獵騎

如雲此駐兵瓦礫不隨塵土化市廛空逐海田更鴻泥雪點
無迹雁翅羅紋舊有聲訪古獨來舒望眼萬峰浮翠入空明
吳道榮秋聲亭詩云歐陽子夜賦秋聲元鎮標時取作名近結孤
亭綠籟起閒尋已慙白風生林間暗瀑喧天落空裡寒濤作月
明霜葉如花還似雨誰能到此得無情亭在熙春山側元邑入
黃鎮成常遊詠其上著有秋聲集一卷後人慕之因以名亭

閩中撫聞

邵武府

四

閩中撫聞卷八

閩晉江陳雲程孫鵬輯

汀州府

通志云天下之水皆東惟汀獨南南丁位也郡名汀州取此
九龍灘上下二十餘里每過一灘兩岍石峽如闕水中石高可數
丈如龍橫截其間屈曲如之乘舟直下一似墜天稍失手卽百
能不救凡舟至此須沽酒市牲拜禱龍王舟人更取竹編籊葉
裹船頭以拒浪倩本土最能者爲之攔護然後敢下者舊傳宋
元時舟楫不通元陳有定始鑿以運汀糧然張籍寄元汀州詩

閩中撫聞

汀州府

有爲郡暫辭雙鳳闕全家遠過九龍灘之句則唐時已行舟矣
○九龍灘曰長龍安龍傷龍馬龍三悟龍五白龍與龍暮龍下
長龍

宋嘉祐中蔡襄守泉州有布衣投刺上謁自稱寧化九龍道士襄
不知其爲神也延之入忽不見取刺而觀得詩云遠遠青青疊
疊峰峰前真宰讀書翁半巖冷落高宗雨一洞淒咏吉甫風溪
隱豹眠寒霧露井凋鳳宿舊梧桐九龍山下英雄氣盡屬君王
宇宙中明年襄過九龍謁廟亦答以詩

寧化城西有顯應廟神爲草倉將軍姓長孫名山李綱南謫日過

此題詩云不愁芒屨長南浦
滿願靈旗助北征
酌徹一杯猶望
眼烟雲何處是三京
刻之于石

曾婦晏氏夫死守幼子不嫁
宋紹興間賊寇寧化晏依山爲砦賊
遣人索婦女金帛晏召田丁諭曰
汝曹衣食我家汝念主母各
當致命不勝卽殺我因解首飾悉與之
田丁感泣用命晏自槌
鼓使諸婢鳴金賊退鄉人挈家趨砦者甚多
乃析砦爲五互相
引援賊弗能攻凡存活老幼數百人

劉安之女九齡遇羽人談道得度及笄許妻何氏忽有白鷺從空
墜劉女乘之而去陳軒詩云白鷺乘去人何在青鳥飛來信已

閩中撫聞

汀州府

二

遙若使何郎有仙骨也須同引鳳凰簫

文文山提兵勤王過歸化明溪題莘七娘廟云百萬貔貅掃虎狼
家山萬里受封疆男兒若不平妖亂死愧明溪莘七娘七娘五代時人從夫征討夫歿於明溪七娘葬之遂居焉宋時著靈鄉人構祠墓前祀之

歸化陳有定以克復陳友諒所侵地授福建行省平章政事據有
閩地明將湯和以書諭降有定殺使者置血酒中飲之誓以死
報後仰藥不死被執送京師臨歿有詩云失勢非人事重圍戟
似林乾坤今已老不死舊臣心子宗海聞父被執自將樂來同

赴京死

明湖陽林大欽及第假歸道經上杭舊有偶句云白水滌頭白屋
白雞啼白晝未有對者大欽隨地問名去縣五里許得句云黃
泥壠口黃家黃犬吠黃昏人稱其工麗蓋白水滌黃泥壠悉縣
轄也

亭亭畫舸繫春潭只待行人酒半酣不管烟波與風雨載將離恨
過江南嘗有人于客舍壁間見此詩莫知誰作或云鄭兵部仲
賢也好事者填入樂府

永定分水嶺路通上杭怪石巖巖亘絕險巖明成化中邑令玉環

閩中撫閩

汀州府

三

鑿石開道銘其巖曰千古乾坤胚胎永定成化肇分萬年歸正
伊天祐寧化人知桃源縣縣有華輪寺男女喧雜禁之不止一日
突輿至寺令僧各負一女監送還家自是慚悔無敢至者邑歲
有無碍錢三千兩留爲郡守壽吏以例告天祐曰此何言也不
雨自天不礦自地烏有積金三千尙云無碍者竟請裁之

國朝周櫟園亮工以叅政駐節上杭時山海交警周日夜登陴戒
嚴作詩示友云海水羣飛百丈高同君城上擁弓刀戰癘莫向
燈前看恐惹霜華上鬢毛

張九齡詩云謝公樓上好醇酒五百青蚨買一斗樓在長汀縣南

今為士女遊觀之所黎媿曾士宏聞酒曲云板橋官柳拂波流

也勾春朝半月遊數盡紅衫分隊隊齋錢齊上謝少樓夜周櫟

園作閩茶曲媿曾作閩酒田以配之又云長槍江米接鄰香冬

至先教辨壓房燈子才光新月好傳箋鎮重喚人嘗汀俗冬至

而壓房一種尤為珍重社前宿雨暗荆門接手東鄰隔短垣直待韓婆風

力軟一厄陽鳥各寒溫長汀呼冷風為韓婆風當炭者祀韓婆

新泉短水拍香浮十斛黎香載扁舟獨讓吳兒專價值編蒲泥

印冒蘇州上杭酒之佳者曰短水猶縮水也載貨郡中冒名三白閉分飲部酒如潮三合

東坡滿一蕉讓却登增銀海子久安中戶注風消汀人以薄酒為見風消

閩中撫閩

汀州府

四

會酌當爐細埔中高帘短柳逆糟風近無人乞雙頭賣幾戶朱

牌掛半紅上酒為雙頭次者名半紅誰為狡獪試丹砂却令紅娘字酒家怪

得女郎新解事隨心亂揮兩三花釀家每當酒熟時其色變如丹砂俗稱紅娘過紅酒請有

神仙過門則然家以為吉祥之兆插花賞之

順治三年大圖章京率大兵至百步鋪見二僧云城即開幸勿傷

民言訖不見明日章京召郡民詢之且述二僧形狀民曰郡有

定光伏虎二古佛者近是章京乃詣寺揭帳視之即前二僧也

命鼎新其寺○定光泉人姓鄭名自嚴十一歲出家除蛟制龍

道法宏通淳化八年坐化於武平之南巖伏虎寧化人姓葉法

名惠寬有馴虎之異

汀州有蒼玉洞道旁兩石如門內有烟巖仙掌鶴巢抱雲等石清
氣逼人郡人多鵬詠于此又一石鐫李斯壽字與今篆文頗異
寅湖在郡城東北中有小阜水深不沒許殿輔晚眺詩云秋淨湖
光浸碧紈青螺小影鏡中看晚風吹得垂楊瘦人似襄陽怯薄
寒人家樹影半扶疎堤上秋風老碧梧小艇無人拋桂槳不將
烟雨畫東湖又有子湖在城東辛湖在城西皆以方位得名

閩中撫聞卷九

閩晉江陳雲程孫鵬輯

福寧府

大姥山有三十六峰在霞浦城東南容成先生常棲之石枰石鼎石臼尚存舊傳堯時有老母得九轉丹砂法仙去因呼太母山漢武帝命東方朔授天下名山文改母爲姥唐開元間都督辛子言泊卅海岸夢仙吏告以昧爽姑將之蓬萊司風雨者先驅宜移舟避之既覺如言果風雨暴至少頃澄霽雲霞絢綵有鸞鶴笙管之音因繪圖以進勅有司春秋致祭

閩中撫聞

福寧府

霍童山之香爐峯乃司馬承禎脩煉處李白時訪之有詩云家本紫雲山道風未淪落沉懷丹壑志冲賞歸寂寞鳩來遊閩荒捫步涉禹鑿黃緣泛湖海偃蹇陟廬霍○白玉蟾云霍童山週環九十九峰名著者三十六景勝者四十八

唐開元中薛令之累遷左補闕兼太子侍讀時李林甫不愜於太子故官僚冷落令之欲諷諫明皇因題壁云朝旭上團團照見先生盤盤中何所有首猶長欄杆飲澁匙難縮羨稀箸易寬只可謀朝夕何由度歲寒明皇覽之不悅援筆題曰啄木嘴距長鳳凰毛羽短若嫌松桂寒任逐桑榆暖令之遂自免徒步歸明

聞其貧令有司資其歲賦令之量口受賜肅宗卽位以舊德召而令之已逝矣

黃崎港先有巨石爲舟楫患唐觀察使王審知禱於海靈震雷暴雨凡三日夜始息且視之已別開一港舟楫便之表請于朝賜名甘棠

鄭夢錫弱冠舉進士有才名秦檜欲羅致門下令客啖以美官夢齡作詩云先生傲晚醉官旁不免蹉跎入醉鄉來書恐是醉中語使我大笑譏荒唐檜雖恚而不能害也

康與之在高宗朝與左瑞狎適睿思殿有徽御書上時持玩瑞下

閩中撫聞

福寧府

二

直竊持至家而與之適來留之飲因出示之康給瑞入取殺核輒書一絕于上曰玉輦宸遊事已空尙餘奎藻貯春風年年花鳥無窮恨盡在蒼梧夕照中瑞見之大駭然無可奈何伺閉叩頭請死上大怒亟取視之天威頓霽但一慟而已

乾道元年寧德大旱官民禱雨不應漳灣士人阮元齡撰愬旱魃文齋禱龍湫大雨三日乃止是夕元齡夢黃衣使者來曰上帝命取愬旱魃文君請促裝元齡覺寤乃起齋沐錄其文而焚之明日遂卒年三十五事與長吉相類

鄭宋嘗侍理宗自言其居在北山築有澄庵御書北山澄庵賜之

時有分縣之請擇韓陽坂爲治所議未定因獻詩曰韓陽風景
世間無堪與王維作畫圖四顧羅山朝虎井一條帶水繞龜湖
形如丹鳳飛啣卽勢似蒼龍臥吐珠此地不堪爲縣治更於何
處拜皇都理宗題扇賜答曰愁思太華峰頭雪晴憶巫山一片
雲去國歸來猶未得詩篇遙贈北山君韓陽坂卽今福安縣治
也

龍潭在菰洋下高百丈有二井綠崖攀籐僅到中井宋時王簿丁
大全禱雨於此令人下銀瓶取水繩上得瓦瓶大全疑之復造
銀瓶躬往投之又得瓦瓶大全祝曰龍神有靈吾後當貴幸示

閩中撫聞

福寧府

三

顯墨潭中遂露龍爪大全後登政府

謝舉羽名翺自號晞髮子福安人試進士不第落魄漳泉間文文
山開府南劍翺傾家貲率兵勤王長揖軍門遂叅軍事及文山
殺翺隻影行兩浙遙山川池榭風雲竹木徘徊顧盼失聲哭時
涼秋風急挾酒登子陵臺設文山木主荒亭隅酌酒南望慟哭
以竹如意擊石作楚些以招之曰魂歸來兮何極魂暮返兮關
水黑化爲朱鳥兮有珠焉食歌罷欷歔慷慨竹石俱碎又白製

哀江南四章

百辟巖在福寧境宋少帝航海入閩集勤王師於此文文山自鎮

江亡歸追至則少帝已入福州矣文山長溪道中詩有宮殿扇
春仗衣冠鎖舊遊傷心今北府遺恨古東州之句

蔡景榕寧德諸生能詩嘉靖間倭破城攜之歸至薩摩州斃其首
奴之後依松源山寺老僧異而問之景榕書大明秀才示之僧
留之錄經典及倭國玉篇等書逾年求歸甚切僧與衆議欲妻
之且給以田景榕題雁詩於便面曰金風蕭瑟碧天秋淺水平
沙亦暫遊萬里雲霄終一去野鳧無計漫相留僧知其不可強
乃潛命蓄髮附漳州海船歸聞於官仍復諸生後官隨州廣文
白鶴山寧德之至山也鳥道峻峭紆迴曲折石壁峭削上干雲霄

閩中撫聞

福寧府

四

南連飛鷲嶺北接蓮花峯其對峙海中秀拔萬仞者則爲瑞峯
韓董二仙脩煉於此丹井棋枰猶存

明太祖賜福安孝子王薦詩云父疾精誠禱上天願將已算益親
年孝心感格天心順恍惚神將帝命傳母渴思瓜正歲寒那堪
山路雪漫漫雙瓜忽產空巖裡歸奉慈親疾痼安二詩皆孝子
實錄也

閩中撫聞卷十

閩晉江陳雲程係鴻輯

臺灣府

臺灣本古荒服未入版圖明嘉靖間俞大猷追海寇林道乾道乾遁入臺灣俞駐澎湖時哨鹿耳門外道乾殺土番取膏血造舟遁去占城後倭人居之未幾荷蘭人舟遭風借此栖止約歲貢鹿皮三萬皮乃歸荷蘭崇禎八年始築臺灣赤嵌二城設市城外漳泉商賈皆赴焉十七年鄭成功寇江南敗績乃謀取臺灣荷蘭戰不利棄去鄭氏居焉我朝靖海將軍施公琅舟帥取

閩中撫聞

臺灣府

虎井桶盤嶼克之由是百靈效順海不揚波軍士苦海水鹹海岸忽湧甘泉一戰而克澎湖鄭克塽納款始置郡邑

陳軒年詠偽鄭逸事云戰屺旋師返北轅轉教航海關乾坤金多舊借牛皮地水漲遙通鹿耳門赤嵌城孤遺故壘紅葵援絕駐新屯何緣自比虬髯客豈昧幾先讓太原片石能容百萬人天遺圖讖應南閩也知中國全歸漢妄托仙源可避秦荒嶼畚田登版籍土酋番族雜流民開荒絕勝田橫島易世相傳尙不臣荒遠羈栖尙弗誅敢通叛逆約齊驅漫勞蝟戰爭天下先自鯨吞奪海隅三載相持誰得利兩雄交構待全輸彼蒼籍手平南

紀曠古新增一統圖昔年亡將濟川才仰仗威靈涉險水地轉
海鹹生淡水天回風颶起奔雷官軍血戰滄波險逆虜魂銷劫
火灰灣嶼全收三十六受降澎島赫門開軒年名昂侯官諸生
富才藻少日爲仇家告訐謫戍山左遇赦歸里縱遊海上多感
懷弔古之作

朱幼芝

景英

一元子玉帶歌序云一元子名術桂字天球明遼藩

裔也明亡由輔國將軍依唐藩閩中封寧靖邵王崎嶇兵間無
成事窮蹙竄海外迫鄭氏歸命無所之遂死臨終書絕命詞曰
艱辛避海外總爲幾莖髮於今事畢矣不復采薇蕨聞者悲之

閩中撫聞

臺澎府

二

死時年六十六葬鳳山竹滬里

靖海將軍施公克澎湖僞寧靖王語五妃曰我死期至矣皆曰王

生俱生王死俱死遂同縊堂上後葬之臺灣魁斗山范九池

歲

巡視海疆吊以詩曰忍把童家舊誓忘孝陵風雨怨蒼蒼芳魂

若向秦淮去正好乘潮到故鄉明妃無命死胡沙青塚荒涼起

暮笳爭比冰心明似月隔江不用怨琵琶纍纍荒墳在海濱魂

銷骨冷爲傷神須知不是經溝瀆絕勝要離塚畔人五妃袁氏

王氏秀姑梅姑荷姐也

瀛涯漁唱云高士心棲不二門興亡坐閱似晨昏壇南數畝開花

竹道是當年夢蝶園注龍溪李茂春明季鄉薦竄居臺永康里
題所居曰夢蝶園在府治社稷壇南日誦經自娛人稱李菩薩
云

康熙辛丑臺寇朱一貴煽亂總帥歐陽凱將裨許雲游崇功羅萬
倉等血戰死之賊遂有全臺服優人衣冠相稱以名號文臣遁
逃提帥施公世驄聞報卽登舟抵澎湖扼賊吭與總督浦公保
軍會命林亮林秀等爲左右先鋒攻鹿耳門燒賊船十餘時海
水驟漲八尺我舟並航而入破安平克府治捷

閩中撫聞

臺灣府

三

帶是役也以六月興師七月克復與其父襄壯平僞鄭捷期悉符
澎湖與在巨浸中環島三十六如排衙然昔人多僑寓其上苦菲
爲廬耕漁爲業唐施肩吾島夷行云腥臊海邊多鬼市島夷居
處無鄉里黑皮年少學採珠手把生犀照鹹水卽其地也今設
遊兵汎守焉

夏之芳有臺灣紀巡詩一卷吳廷華有社寮雜詩一卷詳紀臺灣
番俗撮錄以脩攷夏云牢拴竹筏怕身肥帶孔頻頻減舊圍愛
把細腰諸鳳卜楚王宮裡夢雙飛男拔鬚鬚女繡願乍逢鑑貌
儘多疑雕題鑿齒徒矜尙未解雙蛾夜畫眉倦來高枕樹爲巢

簾幕牽連枝格交栩栩夢田非是蝶一身幻化類蟪蛄臨溪問
渡少解艘石澗分流遠擊撞腰上葫蘆頭上羽隻身飛過水淙
淙抄陰尺布不堪縫無褐無衣可耐風北地乍寒偷射獵人人
盡是鹿皮翁吳云刻期插羽走猶鄰未受室謂之猶雨夜風長
往返頻一道官文書到處沿街响激卓機輪鈴鐸霞籃漆籠浦
蝸廬家計休嫌長物無還似老僧新駐錫纍纍東壁大葫蘆秦
贅何從問肯堂閨中仄廕蔓偏長諸姑伯姊家人聚不見男行
見女行琴瑟更張意已乖蕭郎歧路為誰排夫婦不相離異回頭斷
齒追歡日番文成婚尚賸親磨鹿角釵金飾脂膏舊鬢髻爭相

閩中撫聞

臺海府

四

雄長在揜矛而今漸曉秋曹法不掛人頭掛獸頭

鳳山沙馬磯其頂常帶雲烟非天朗氣清不得見故老言頂上時
有絳衣縞衣二人對奕今山上石碁盤石枰猶存夏之芳詩云
仙山縹緲閣斜曛石上棋枰舊印紋沙馬磯頭人罕到欄柯樵
子話烟雲

諸羅縣玉案後山之麓其下水石相錯石罅泉湧火出水中燿
無烟焰發高三四尺晝夜不絕置草木其上則烟生燿烈石燿
而堅傍石之士燃焦如石名曰火泉好事者多往觀焉

古橋岡詩序云鳳邑未入版圖時邑中人六月樵于大岡山忽見

古橋挺然山頂向橋行里許則有巨石一座出石門入庭花開
落堦草繁榮野鳥自呼廂廊寂寂留題詩語及水墨畫蹟登堂
一無所見惟隻犬從內出見人搖尾不驚曲折緣徑皆合抱橋
樹也垂實如椀大嚼之甘香異常橋因袖懷數顆俄而斜陽入
樹山風襲人遂荷樵歸遍處誌之至家以語人出橋相示再往
遂失所在

暗浮在臺灣之東北有紅纛舟泊其地無晝夜山明木秀萬花遍
滿而上無居人謂其地可居遂留二百人給以一歲之糧次年
復至則山中俱如長夜所留之番已無一存乃取火索之見石

閩中撫聞

臺灣府

五

上留字言一至秋卽成昏黑至春始旦黑時俱屬鬼怪其人遂
漸次而亡蓋一年一晝夜云

臺灣草木經歲不萎花開無節黃巡方叔琬云余仲冬按部至斗
六門見桃花盛開至笨港見人擎荷花數枝回署見榴花照眼
張巡方湄有真個四時皆似夏荷花度臘菊迎年之句

臺地西瓜有種於八月成於十月者用以充貢故朱筠圍仕珩有
句云何須更沐溫湯水正月 神京已進瓜

閩中樞聞卷十一

閩晉江陳雲程孫鵬輯

永春州

隋旣平陳叔寶之子號鏡臺翁與宗族引兵南奔據桃林場之肥湖後承旨籍爲民又有稱御史大夫者亦叔寶子隱於峭峯陳氏皆其後也

唐盛均字之才博物強記嘗病白氏六帖踈略廣爲盛氏十二帖條貫百家頗資士林所好舍人皇甫煥以辨博自處每賓客及門必延飲證事屈者多自引去惟均終席時謂勅敵也官韶州

閩中樞聞

永春州

刺史

後唐天成間陳保極與弟元亮仕江南李氏陳元愷處永春縣記云詩人賦客則陳職方名擅梁國陳行軍聲騰江左蓋美保極兄弟也

丁溪在德化縣前丁方上爲鼇山舊識云水盡丁羅簪纓宋元符中邑人林程買田開闢會於漣溪一夕雷雨忽決成丁字其子揚休果登第邑令贈詩有水從鼇頂分丁派人向蟾宮占甲科之句

陳知柔字體與秦檜子燿同榜進士檜當軸時前列十餘人皆以

攀援致通顯知柔獨不阿附性好山水自天台至會稽就其巖壑罷知賀州復留惠陽

紹興二年蔡絛爲建州貢院考官謂人曰吾取中一生策三篇皆欲爲朝廷措置大事他日必非常人乃朱晦庵也

蘇紹成德化人委業天慶觀後隱北山朱文公嘗造其廬書廉靜二字贈之且銘其琴曰養君中和之正性去子忿欲之邪心乾坤無言物有則我獨與子鉤其深

多暇亭在清和堂後飛杠跨水四面皆蓮塘知永春江公望賦詩云作吏如兼隱爲儒也解禪了然無箇事坐地自調絃

閩中撫聞

永春州

二

莊少師夏葬父鬼岫山宋光宗書錦繡二字賜之因改名錦繡及卒寧宗贊其像曰天生美質學業道適堅冰志操歷視三朝忠言逆耳書史所標宗祀繁衍百世不祧其受遇如此

蓬萊山迴環秀麗與錦繡山相對恍惚蓬萊故名侍郎莊夏居此魁星山古桃林場在焉其上有巖初名詹巖以宋陳樸顏應時登第改名魁星

明顏廷榘以詩翰得名判九江時探匡廬彭蠡諸勝登眺吟咏江湖人以白司馬呼之年七十餘縱遊燕薊吳越間所至皆留詩紀勝

德化龍湖寺舊有鐘聲聞數里明末邑令某命移於醒龍樓未至
僧追及之以指彈者三撞擊之無聲矣

閩中摭聞

永春州

三

閩中撫聞卷十二

閩晉江陳雲程孫鵬輯

龍巖州

元祐間龍巖陳備與劉棠以詩賦擅名時人語云劉棠陳備漳南賦虎劉登第後陳遂隱溪南賦詩云大不手持卿相印小無人擁使君符門前溪水綠如染好把一竿坐釣鱸

曹四公生時香霧濛山三晝夜不散因名其地爲香山元祐間有神爲鄉患每歲以童男女祀公詣廬山學禦妖術歸人聞空中金戈鉄馬聲神求活許其栖水尾潭中後不爲厲紹興初大疫

閩中撫聞

龍巖州

公以劍刺石液湧如水飲者立愈會洪水漂民田公於壩上立壇以柳枝矢射水中少頃一巨蟒浮水面紹興十年沐浴更衣而化

石應岳登隆慶辛未進士官給事後上十餘疏皆鑿鑿可行及爲應天府尹與都御史海瑞相契民有總憲清如水京兆白於霜之謠

廖天瑞除新昌縣有善政歸里囊篋蕭然工詩亦精岐黃術嘗題齋聯曰相不得爲醫得爲稍扶人世名非所好酒所好聊樂我生

丞相巖在龍門里宋文丞相天祥經此題詩石壁時為景炎二年也

天祥經此題詩石壁時為景炎二年



閩中撫聞

龍巖州

三